


AHEPERI, EKAPIITULU

YA NEETHANU NENLI ²

 Mureerihiwe! Kinoona wira, yoopacerya, nookhalana mwanamwane va, Doc okileenle-awe minuutu vakhani sivinre, muhim'aka, munna mw'erutthuni, aatthuna...aari wira ovahereriwe. Nto vano vakhala wira aximai awo aakhalana axikhaani aya anthunaya waavahererya w'Apwiya, ninootteeliwa murima owaakhela yaawo naanaano va wira erwe, yaaruuhe axikhaani aya nno.

²³⁹ Vano, ni atthu anci-ene, awo, aniihanaaya, waapatisa. Ekereja Metotista enniira, ni kookupali wira aNasareeno. Nkikupanli. Nnari. Kinoona wira mwaha wa yeeyo awo yiivalannye aya, waari opatiiso w'anamwane, Nasareeno ni Metotista Yootaphuwa. Masi, nnakhala vo, akina aya, anniira etthu emosa wala ekina. Masi, akina aya anaahelala maasi vakhani. Akina animwaayeeherya. Nto, masi hiyo khula okathi ninthuna okhala oolikanaxa ni Bibilia ntoko sinsuwel'ahu. Vano, khiivo hata Yoolepwa mBibiliani wira mwaana oyeeheriweke, nnakhala khekhanle Yoolepwa mBibiliani wira mutthu ti mutthu oyeeheriweke. Khehiyo etthu Yoolepwa. Eyo ti yooruma ya ekereja Katolika.

²⁴⁰ Masi awo—masi awo anniira, yaaruuhale... Yaahiruuhiwa anamwane wa Yesu. Ni—ni hiyo nihaana omuthoonerya Yoowo. Ninthuna niireke etthu emosaru Owo iiraly'awe. Owo aawiixaathenrye matata Awe khwaa—khwaareeriha, khwira, “Mwaahiye anamwane erweke wa Miyo, ni muhaakhoottiheryeke, okhala wira Omwene wa Wirimu ti wawaya.” Nto ti yeeyo ninthikelaahu wira va otapernakulu, niphavelaka omutthara Bibilia eekeekhai, ephiro yooreerihiwa, enamuna yooreeraxa ensuwelaahu.

²⁴¹ Tivo vano, vakhala wira mai ule, wala aximai akina aakhalana attuutthu aya wira evahereriwe, okathi Munna Gertie onrumihaawe *Mwaaruuhe*, vano, nyuwo mwaaruuheke waltaari. Munna ni miyo ninookhuruwa wira naavahererye axikhaani awo w'Apwiya. Vaareera.

Munna Neville... [Nipuro vahiitthu mufiitani—Mol.]

²⁴² Kooxukhuru, Munna Gertie. Ti yooreera saana. Akavi anaaphenta anamwane? Mwaahaaphenteke, yookhala etthu evonyeiye ni nyuwo, yookhala etthu evonyeiye.

²⁴³ Vano, ohiy'ula, vano ninrowa okela mmitekoni sikina. Hiyo...mwaha wa yeeyo kirwiiyaaka-tho ohiy'ula. Voolimaleleya mahiku ala naakhalanaka muteko wo ovoniha,

kinkhalana paahi ntoko mmosa khula nihiku, okhala wira onnikitatha vanci-ene. Nyuwo khamunsuwela. Nto owaani va enkhalana voorika vaili ovikana nipuro pi nipuro.

²⁴⁴ Nto miyo kaaveka muswammaha mwaha wa epurepure kiiralyaaka ni yeeyo voosiis'ula. Masi yoopacerya yaakihaaxale, waari okathi Billy orwiiyaawe okileela wira khaawenrye waaphwanya athu oophiyerya wira aakawele ittikitti sa mavekelo. Owo owenrye paahi okawa soophiyaka muloko ni piili wala muloko ni xexe. Ni owo aarina e...Khaavo aathuna ittikitti sa mavekelo. Kinoona wira sothene saari saana. Vano nto, mwa yeeyo, miyo nkinatoko wuupuwela... Vano nto vapaceny'aka wihana ittikitti iyo sa mavekelo, koono wira kaamukhalana muloko wala muloko n'aili, wala ale yaari muumu. Kiwiihana. Kiphiyerya nummeru nlo, etthu, nto khiyaahana. Nto kiihana. Khiwaakhanle waakhula. Ni nkuupuwenle mpakha Muhano Wood okiihana. Owo khwira, "Munna Branham, Billy onikuxa ittikitti iye ni otakaniha vamosa, ni okawa paahi. Khino owo orina nummeru na natthaaru nle," (khinaari nenlo?) "nummeru na natthaaru mpoolosani mwawe."

²⁴⁵ Tthiri, voolimalela owo onkawaka miloko mithanu. Okathi owo onaaruhelaawe athu, owo onootakanxa. Tivo athu othene...Kahi wira, "Mukivahe nummeru noopacerya." Wala, siiso nihipaceryaka nummeru noopacerya. Hiyo pooti ohipacerya miloko mithanu, khivansuweleya, ni opacerya ottuli. Pooti opacerya thanu na tthaaru ni okelela ohoolo. Vaanweryaneya opacerya miloko miili ni okelela ohoolo. Hiyo khanisuwenle. Masi owo onootakanxa paahi ni waakawela athu okathi awo antthunaaya. Ni miyo, kihupuwelelaka voosiis'ula, vaamuweryaneya wihana xexe wala thanu tho, nave awo khuhikhala vale, okhala wira vaamuweryaneya okhala mmiloko miili wala miloko miraru nipuro nlo, moone. Vano, nto, masi Apwiya aalokiha, masi kherina e—ekhanyereryo y'ekeekhai wa yeeyo, ntoko sinikhalanaaya waahikhale owaani. Siiso kihehereryaka—kihehereryaka emaara ekina.

²⁴⁶ Masi, va woohikhala khalayi, miyo kaahaavekela Apwiya wira Awo enivahe muthukumano wooreera, kaahihimyaaka wira miyo—miyo nkaarowa waavekela—tho Awo yeeyo, okhala wira ennikhalaka etthu yoolipaxa. Ni eyo ti yoovirikana ni Yolempwa. Munnona? Nto nyuwo mwa...Ti yeeyo enikhaliha yoolipa wa miyo. Okhala wira, kisuwelaka yeeyo, eyo ennikiphwanyihia o—oxinttiwa, opacerya wene. Munnona? Miyo kooxinttiwa, opacerya wene.

²⁴⁷ Nnakhala vo, mutthu mmosa aahimulikarela mutthu oxekuw'ola. Muhano Wood aahilikareliwa ni mutthu. Nto khwira, wira, "Mutthu mmosa mukereja aahilikareliwa voosiis'ula, mwaha wa mulopwana mmosa ahaareere, owereywa

saana, aaruule wa Kristu oxekuw'ola, nuumala." Wira mu—mulopwana owo ahaareere owereiwa aahirwa wa Kristu.

248 Ni etthu ekina, Muhano Wood khukileela wira kaahilavula ni munn'awe, nuunu, wira tthiri kaari ethhoko awe nihiku nlo khulya ni yoowo, wala olya ohiyu ni yoowo, oKentucky. Ni Muluku Oowerya sothene onnisuwela wira nkaamusuwenle muthiy'an'ole. Munnona? Ti yeeyo. Pahi... Soowona ti soomwaneene. Hiyo khaninsuwela moota xeeni sinrowaaya orowa wala etthu enrowa okhumelela. Eyo ti ya Muluku, ni etthu—etthu eniiraneya. Masi miyo kaasuwela, kaalipelelaka, kilipelelaka vaavale.

249 Nto nihiku nlo okathi mwaaruusi ula aaryaawe mu, yooniwa wira aahikhalana olamula sa mmurimani, yeeyo miyo, kahi... Moone, vaakhanle wira Muluku aanvaha eyo olumwenku wothene, yaamukhala yooreera; masi vaakhanle siiso, yaamukhala yoovirikana n'ile Owo aakihimenry'awe kituphaka ephiro nno, moone, miyaakha vakhani sivinre. Ni hiyo naatthuna nikupali wira yaari ekeekhaii, ni ohiya ekereja, okhala wira waari vaava, wira yoone. Nto siiso miyo kaahimwiihana Muhano Snyder ole. Munna Snyder. Owo ori vaava nipuro nlo. Owo t'ohiiwa saana vakhani. Nto mwaamuthiyana aahilavula yeeyo vathi, khwira, "Nyuwo murina mwaamukokho," wala wiipa makhonyokhonyo, etthu ntoko siiso.

250 Yeeyo, kaasuwel'aka wira yaari eyuunu yaakhumunwe. Nto siiso, vano nto Erooho Yoowaarya khuruuha eyo voosiis'ula. Munnona?

251 Vano, exeeni iyo, eyo ti yoovaha ya Muluku, ni envara muteko mwa omwaneene aya. Masi exeeni enkhalaha yoolipaxa mu mpooma, vaxariya, miyo—miyo kinniivitikelela, okathi wothene, kaavekelelaka aretta va. Wala—wala... Kinoorowa, waaleela atthu ela. Kinoorowa, wira, "Vano Apwiya ahoovonihani. Yesu ohoovonihani okathi Owo ookhwenly'aweni, iyaakha ekonto emosa n'imiya thanu na xexe sivinre. Vaavale vale moovonihiwa. Vano, vanihimmwa Muluku, vanihimmwa Kristu, nyuwo moovonihiwa, miyaakha ekonto emosa ni imiya thanu na xexe sivinre. Eretta anyu khekhanle-tho. Ontthuneya waamini wanyu wira wiirihe."

252 Vano nto mutth'uwo onoowerya orowa nave kuhivona. Vano mutthu onimoorwa, wira, "Munna Branham aakileenle wira kaahivona." Munnona? Miyo kinooleelani ele Muluku ehimmy'awe.

253 Vano, eyo yaalavulaka emulukamaka mutthu, oratta-ene, "Eyo ti SIISO ANIHIMYA T'APWIYA," wa etthu emosa enrowa okhumelela. Eyo enimoolipiheryani vaavale vale wira ovonihiwa wanyu ti woolipihwa. Waamini wanyu woolipiherya. Munnona? Natiri t'awinyu. Nlo khanihiyo nuulumo naka.

Awo Masu a Muluku, wira moovonihiwa. Munnona? Masi nyuwo paahi. . . Mwa enamuna emosa wala ekina, miyo—miyo vekeekhai nkinwerya okeliha, mw'atthu nno oJeffersonville. Miyo—miyo nkinwerya wiiriha eyo wiiraneya tu. Koosuwela. Kinoophavela otaphulela eyo saana ntoko sinwery'aka, nto eyo paahi—khenrowa wiiraneya tu. Ti yeeyo tu. Miyo kiniira. . .

254 Nno, woohikhala khalayi, miyo kaahirowa ethhoko emosa, wa mulopwana mmosa, nto mulopwan'owo aamookhwa. Vano awo khukiihana, “Murwe, munvekelele. Tothoro aahimmye wira owo khaarowa okhala mukumi mpakha voosiisu.”

255 Miyo khuvolowa. Nto mmiravo khukiirela, “Mwenye Branham, miyo nkinthuna okhwa.” Vano, vekeekhai mmiravo owo khaatthuna. Owo aahikhalana emusi ya aana aili iwe.

256 Ahe, miyo khuurama. Miyo khwira, “Vano, nkawehani, t'ani okhanle tothoro anyu?” Owo khukileela. Miyo khwira, “Vano, tothoro khino oohimenryeni wira mwaarowa—mwaarowa okhwa, masi Muluku nlelo khonahimye wira munrowa okhwa.” Miyo khwira, “Vano, voomutthariha Bibilia, nyuwo moovonihiwa, okhala wira Yesu ookhwela ovonihiwa wanyu.”

257 Owo khwira, “Munnaamini wira kinookhala mukumi?”

258 Miyo khwira, “Miyo kinnaamini mara.”

259 Ahe, kaaronwe-ru onvekelela mutthu, nave kuhirumeela enamuna yeeyo ya waamini, wira kaamini mwaha wa yoowo; kaaronwe-ru, “Oh, nnari, vakhala wira tothoro ohimmye wira munrowa okhwa, munrowa okhwa. Eyo ennimaliha mwaha vano.” Vano, aarowa okhala mutthu xeeni uwo wira orwe aavekelele aretta? Miyo nkaarowa omutthuna mutth'owo owannyaka, wira okivekelele. Miyo kimmuthuna mutthu onii, hata ohoonaka, wala nnari, owo aamukuxa waamini ni omweemererya natiri wa miyo. Ti yeeyo. Nto miyo khwira. . . owo. . .

260 Hiyo naahirowa khukhalana mavekelo. Miyo khwira, “Vano mulipihe murima.”

261 Owo khwira, “Munihimya wira kinoovona?”

262 Miyo khwira, “Vano, vekeekhai. Masu a Muluku ahimmye wira nyuwo munoovona. Moone, 'Mwaaminikiru, sothene sinniweryaneya.”

263 Owo khwira, “Vaareera, Miyo kinimwaamini Awo.” Nto khukhuma khwaaleela amwaar'awe wira. . .

264 “Mulopwana owo onimookhwa, kahi siiso?”

265 “Ayo, ti siiso.” Nto siiso mmeeloni mwaya, mulopwan'owo khukhwa, wala mahiku manli numala yeeyo.

266 Vano muthiyan'ola khunakhuma ni opacerya owurya ni wira soonanara. Nto mmosa wa matiyaakono, kookupali wira aari yoowo, a ekereja yeela, khurowa wa muthiyana khunvekela wira

atthike ni atthikele okereja. Owo khwira, “Miyo nkaaarowa omwaamini hata mutthu. Mulaleyi Branham aahirwa va khwaavekelela aiy’aka, khuhimya wira yaamurowa okhala mukumi, vano awo khukhwa mahiku maili wala mararu ohoolo waya. Tivo, miyo nkaarowa waamini.” Vano *owo* onimookhwa. Vaareera.

267 Masi, nnakhala vo, nyuwo moone, eyo enrowa wooniherya paahi wira atthu khancaliwa ni etthu enihimiy’anyu. Munnona? Vekeekhai. Miyo kaanvelenle-ru mutthu, ni miyo—miyo khunaahimeerya wira atthu ale anrowa okhala akumi. Miyo kinnaamini wira awo anoorowa okhala akumi. Masi, hata wira, vakhala wira nuulumo naka naari voomalela SIISO ANIHIMYA T’APWIYA, nto nyuwo mwaahaaminiru Yaawo, mwaankhwa, khula enamuna. Vekeekhai. *Va* eri SIISO ANIHIMYA T’APWIYA, ni anci-ene aya annaakhela Nenlo nave khukhwa. Anci-ene a awo annirowa omooroni, eryeene, SIISO ANIHIMYA T’APWIYA, “Ehikhaleke siiso.” Eyo ekeekhaii? Vekeekhai. Munnona? T’ile. . . Yothene enlipiherya ni waamini wanyu.

268 Munna Collins, nkikupanli wira ori vaava ohiy’ula. Masi kimwiiwaka voosiis’ula, owo oolavula etthu yoosuwaneyeya mwa yeeyo. Munnona? Munnona? Owo ohiira. Owo iirale, “Vano, waamini omosaru nyuwo murin’anyu va, muhaana orowa okhalana iwo. Okhala wira, iwo omwaamini wanyu w’omeekha, kahi muromolelo anyu, masi Kristu. Nyuwo muhaana okhalana waamini yoowo.” Eyo ekeekhai tu. Voomalela.

269 Ni ovoniha wa Muluku onlipiheriwa ni waamini wanyu. Masi vootthariha Masu a Muluku, SIISO ANIHIMYA T’APWIYA, wira khula mutthu oovonihiwa okathi Yesu okhwiy’awe oKalvario, “Owo ohaaxeriwe sootheka sahu, makhwatta Awe *t’anivoninhe*.” Eyo ekeekhaii? Hiyo *noovonihiwa*. Bibilia ohimmye wira, “Moovonihiwa.” Tivo muhiphwaneyo nthowa ni miyo, miyo ka mulaleyi a Masu paahi. Nyuwo murewe mwamulelele Muluku wira Owo ohimmye etthu yoovoneya, nto Muluku onimooleelani vari olosowa wanyu nto. Munnona? Tivo, iwo waamini wanyu. Yesu ohimmye wira, “Mwaaweryaka waamini. Mwaaweryaka waamini.”

270 Vano, mwaaiwaka Erooho Yoowaarya wira yoolipiherya waamini wanyu olipiha muhina, ni khwira, “SIISO ANIHIMYA T’APWIYA, ‘Meelo okathi *khata*, munookhalana etthu *khata*. Etthu *khata* enookhumelela. Onrowa okhala nno enamuna *khata*, nto munoophwaneyo etthu *khata* nno. Eyo enrowa okhala ethooneryo wa nyuwo.” Vano, nwehe yeeyo. Owo muteko woomalihiwa, naanaano va.

271 Masi waahimmwaka ovoniha wa Muluku, kihaana ohelela ovoniha wa Muluku mwa mulipiheryo mmosaru, ya enamuna yeeyo, ntoko woopowa. Khula mmosa a nyuwo, hata wira

mwinre exeeni, nyuwo muhoopoliwa okhuma okathi Yesu okhwiyaawe, okhala wira Owo okhwiye wira attipihe itampi sa molumwenkuni. Masi khenrowa wooreerelani etthu mpakha nyuwo mmansinyu mwaakhele ni musuwele saana. Masi vanihimmwa itampi sanyu, sooleveleliwa. Ti yeeyo. Owo... “Mmoone Mwaapwittipwitthi a Muluku onttipiha itampi sa molumwenkuni.” Munnona? Eyo eri vo. Vano muupuwele yeeyo.

²⁷² Vano, koosuwela wira mwa wiixuttiha, mwa Soolempwa, hiyo na muthukumano wootakaaheya. Ni imaara sinciene, muLiivuruni mu mwa aHeperi, ekhanlanxe Eliivuru yoowiixerya saana... Kinrowa wira kikhumme-ene vakhani vano. Kinrowa ophavela ohiy’ula omaliha apantte yookiserya ya ekapiitulu 7.

²⁷³ Nto vano sookhala sookoha sinci-ene mmuruni mwanyu, vekeekhai. Anci-ene a nyuwo mookhalana sookoha, ni miyo kaamukhalana, nave. Vano, okathi onttharelana, Apwiya yatthuna vale, kavolowaru... .

²⁷⁴ Kinrowa oMichigan vano. Vano nto, okhuma oMichigan, kinrowa oColorado. Ni okhuma oColorado, mpakha Olimani Onkela nsuwa. Vano—vano, natthika vale, Apwiya yatthuna... . Vano, miyo nkisuwente. Kaahikhale oChicago, Ettiminku, siiso kitthikelaka vaava Ettiminku enrwa ohiyu.

²⁷⁵ Vano hiyo ninnimukhaliha pastore ahu vapulpitu va mwa isumana soophiyaka thanu na mosa, mwa sothene iya—iya—Eliivuru ila va. Munnona? Vano hiyo... . Miyo khenkisivela wira yeeyo. Munna Neville munna mmosa, oophenteya, ooreera murima. Ni miyo kookupali wira ekerej’ela ennimpheenta Munna Neville.

²⁷⁶ P’uhimya wene, kilavulaka, mutthu, ipantte seiya nipuro nlo, oottheka mwaha w’olepa ipaphelo kamosa-kamosa, wira okumihwe Munna Neville vapulpitu va. Muhaana olokiha eyo ni miyo. Uh-huh. Ti yeeyo. Uh-huh. Ayo, vekeekhai. Vano, kintthuna wira nyuwo... . Ohimye tiya... . etthu emosa mwaha wa nikhuru na matiyakono. Nikhuru na matiyakono khanrina naata ni pastore owo. Nnari, mulopwana. Muthukumano, wothene, wookhalana oruma wothene. Kehiyo... . Nikhuru na matiyaakono mapiliisa paahi va mukereja mu, wira ekhaliheke mmaaleleyo ni sikina. Masi yaphiyererya malamulo, ekereja yothene ehaana ohimya siiso. Ekerej’ela etekiwe vasulu va elamulelo ya ekereja ya vaava. Tivo, miyo nkirina hat’etthu yoohimya yo omukumiha pastore ola, wala omuhela mmosa. Miyo ki mwaneene a ekhalanelo; envahiwa ekereja. Nyuwo othene mwa ekereja. Nyuwo atthu ti muneettiherya. Nyuwo mwa ekereja, yeenyu. Nto Ekereja, Ekereja yoowaarya ya Muluku ti elamulelo, ya Erooho Yoowaarya Mukereja mmo. Nto etthu emosa paahi eniiraaka okhala mwaneene a ekhalanelo, kinvaha ekerej’ela, kininnya ntoko ekereja, ni ti yoohiliva mipoosito. Ni

ekereja ennaathanla mapastore aya. Miyo nkirina naata n'iyoy. Nto enamuna emosa pastore ola aakhanlyaaawe okhumaka, waarowa okhala pastore olakela mwaneene orowa, wala mwaathanle munci-ene a ekereja aahaana wira, "Aakakhanyiwe pastore." Eyo ti enamuna emosa paahi. Hata nikhuru na matiyakono khanikhanle wira eyoy. Nikhuru na matiyakono ninkhaliha worti paahi n'itthu mukereja.

²⁷⁷ Maatiministratoore, awo kharina naata n'iyoy, olokiha ekereja paahi. Ni khakhanle wiiraka mpakha okhala e... Nikhuru nothene na maatiministratoore othukumana ni wira, "Ninrowa oteka *ela*, wala ninrowa wira *ele*." Vano awo ahaana omukoha namasuka muhakhu vakhala wira aakhalana musurukhu wira yiire yeeyoy. Ayo, mulopwana.

²⁷⁸ Masi nakhala nthowa mwaha wa mempuru, mempuru akhalana nthowa ni mukina, wala etthu yoovonyeya, nyuwo muhaana orowa wa munn'owoy, yeenyuy, n'ulavula ni yoowoy, nyuwo ni yoowoy paahi. Vano awo yaahaakhele, nto etthu enttharelana eniiraneya, mmukuxe mmosa wa matiyaakono wala mutthu, nto orowe ni nyuwo wa munn'owoy. Vano owoy aahiwaakheleni, vano murwe muhimeerye ekereja. Vano vakhala wira ekereja... Vano owoy aahaakhele ekereja, nto Bibilia ohimmye wira, "Awo ekhale ntoko apakawuy ni namattheka." Ti yeeyoy.

²⁷⁹ Ni khula mutthu ommusuwela mutthu otthenke, ni ohinarowa wa yaawoy ni olavula, vano nyuwo mwa epantte ya ekereja ya Mulukuy onrowa waakhula mwaha wa etampi iyoy. Ti yeeyoy.

²⁸⁰ Nto akhala mutthu ti mutthu nto orina n—nthoway ni tiyaakono, wala ni tiyaakono wala mutthu mukereja, antthuneyay atthu araruy. Atthu araruy yaaroway orway yiire, anamoona, mwaanoy wa anamoona aili wala araruy. Erwe emuleele pastore wira nookhala nthoway ni tiyaakono. Nto nakhala nthoway ni tiyaakono, tiyaakono aahikhaley mu—mutthu a xariyay, mu—mutthu oolokay. Owoy ohaana okhaliha mutekoy wa tiyaakono, wa xariyay, ophwanyiyay okhala a xariyay. Nto muthukumano owoy wasuwelary wira tiyaakono uwoy khonkhaliha siisoy mutekoy owoy, owoy onaakuxay araruy ni yoowoy ni oroihay eyoy wa pastore. Tiyaakono owoy onoovekeliway ohalay owaani ohiyuy uwoy. Nto voy pastore okhumay... onimoorway ni oruuhay muthukumano vamosay, khuhimiyay nthoway nene. Ni muthukumano wathanlay wira tiyaakono otthikeley, tiyaakono onootthikelay. Owoy atthi-... wathanlay wira tiyaakono ohiihiwey, awo anoomuthanlay tiyaakono musyay ohiyuy eney yoowoy. Munnonay?

²⁸¹ Tivoy, khaavoy hata mutthu mmosay orinay nnaatay ni yeelay. Ti onamunci-ene way atthuy. Ayo, mulopwanay. Milokoy miiloy yamweemereryay, ni milokoy miiloy ni mmosay oonvirikanyay, owoy onooroway; walay, voovirikanay. Munnonay? Eyo ti wiiy, ti elamuleloy

ya ekereja ya vaavo ni, nto, khula mmosa wa mamempuru ookhalana yoohimya mukereja. Etthu yakhumelela, yoonanara, vano awo anoorwa voowaakuva, nto etthu emosa paahi awo arinaaya wira okhala ohoolo wa Muluku yoone wira vekeekhai khiivo hat'etthu enikhoottiha weetta wa ekereja.

²⁸² Masi okhulupale woolikana ni woomalela wa ekereja ti pastore. Musome yeeyo mBibiliani, moone naahikhale nlamulo na Bibilia. Eyo ekeekhai voolikana. Khaavo hata mmosa vasulu va humu. Nkirina-vo etthu n'ile Munna Neville oniir'awe va. Eyo ti yawinyu ni Munna Neville. Vakhala wira Munna Neville aatthuna olaleerya mwiixuttiho wa Anamoona a Yehova, eyo ti yawawe owo ni nyuwo. Munnona? Owo aatthuna olaleya etthu p'ithu owo aatthunaawe, eyo eri eriyari ya nyuwo ni yoowo. Ti yeeyo tu. Muthukumano wamuthanla vale, wira olaleerye yeeyo, ti yoolikana. Eyo ti yawawe.

²⁸³ Etthu emosa paahi eniiraaka, okhala mwaneene ekhalanelo. Nto yakhala etthu ekina enoorwa, enkhala ntoko omukumiha pastore, ni awo enatthuna othanla mwaha wa yeeyo, khimwaakhanle onvekelaka tiyaakono wira aire eyo. Mwaamoorwa mukivekele miyo. Miyo kaamoorwa, kiire, "Mwaatthunaka omukumiha pastore, mukileele mwaha aya. Owo orimwiira etthu?"

²⁸⁴ "Ayo. Hiyo nrimwaaphwanya, ehapaliwe." Wala, "Hiyo nrimwaaphwanya yiraka *ela*, wala yiraka etthu yahaari yoooreera."

²⁸⁵ "Nyuwo mookhalana anamoona araru a yeeyo?"

²⁸⁶ "Ayo. Hiyo nookhalana."

²⁸⁷ Anamoona awo ahaana wehereriwa toko. "Muhikupaliki enihimyaniwa mukhulupale ehikhanle ni anamoona aili wala araru, ni awo yooniheriweke toko; onvirikanya mukhalupale." Vano muhaana olapha eyo, wira muhoona; ni wooniherya, wira muhoona.

²⁸⁸ Vano nto, vakhala wira muhiira, nto etampi iyo enoopwapweliwa voowooneya, wira, "Ti yoonanara." Nuumala mwiire, "Muthukumano, muntthuna omwaakakhanya pastore anyu?"

²⁸⁹ Nto muthukumano wathanla, "Mmulevelele, ni mmuhiye atthikeleke," ti siiso entthuneyaaya okhala. Munnona? Eyo, eyo kahi yeexariya? Eyo kehiyo enamuna yo weettiha ekereja? Ti yeeyo Bibilia ohimmy'awe. Hiyo khanrina mapixipu ni anamawehaxaxa a athu othene, ni makhuru ni sikina, ammuhela *ola* n'ukhalana okhulupale. Khaavo orina okhulupale va woohikhala Erooho Yoowaarya. Ti yeeyo. Eyo t'eneetiherya. Nto hiyo ninkuxa Yeeyo ntoko eyaattelo y'atthu, epantte athu anrowaaya.

290 Vano nto epantte emosa yatthuna wira *ela*, nto epantte ekina enatthuna wira *ele*, vano epantte enaxintta, epantte exinttiwe, awo aniira exeeni wa yeeyo? Wiitakaniha n'ale akina, aniira, "Hiyo naahivonya, nto. Hiyo ninookelela ohoolo, okhala wira Erooho Yoowaarya yoothanla eyo." Munnona? Eyo ekeekhai voolikana.

291 Ntoko Atemokrata ni Arepuplikaano, kweekwe ni okathi onkhalaahu ntoko etemokrasiiya, ntoko a atthu a wAmerika. Atemokraata yaxintta, Arepuplikaano yaahaana okakha vamosa ni yaawo; Arepuplikaano yaxintta, Atemokrata anookakha. Munnona? Vekeekhai ti yeeyo ennikhaliha hiyo elapo. Khula okathi onihononaahu yeeyo, ninhonona etemokrasiiya ahu. Ti yeeyo. Atemokrata yaira, "Miyo nkinrowa wira etthu; Arepuplikaano aaxintta." Vano hiyo ninoomora. Miyo ka muKentucky: vamosa ninnilipa, nakaweanyeya ninoomora.

292 Vano, yaakhanle-ene etthu evonyeiye mukereja mutonko anyu osuwela, mutthu mmosa wala mutthu wala etthu p'itthu, nyuwo muhaana ni munoorowa waakhula ohoolo wa Muluku mwaahilokihe etthu iyo; nyuwo, ekereja. Vano, muupuwele, kheri mmakhatani mwaka. Eri mwa awinyu. Nto etthu p'itthu yootakhala mukereja, Muluku onoowaakhulihani mwaha wa yeeyo. Ti yeeyo. Eyo ti enamuna Owo oneettiheryaawe ekereja Awe. Ti siiso ery'aya mBibiliani. Eyo ti yooruma ya Bibilia. Eyo ti eyuulupale ya ekereja eri ya vaavo. Pastore ti muru. Ti yeeyo. Amen.

293 Vano, niphiiyeryaka Mutthak'ola wooreerihwa, wa khalayi va. Nyuwo, vano kintthuna wira musuwele eyo. Ela enookaravariwa mufiitani, muupuwele, Mutthak'ola. Ni sookaravariwa sa ekereja mufiitani, malamulo ni sooruma sa ekereja, siri sookaravariwa mufiitani. Eyo entthariha Bibilia. Hiyo khinneettiherya eyo; khaavo okhanle muru. Nnari. Othene, hiyo othene nri mmosaru. Masi, hiyo nookhalana namweettiha, owo ti pastore, vaakhalakaru wira owo oneettihiwa ni Erooho Yoowaarya. Ekeekhai. Vaareera.

294 Vano, mu, sinoorowa okhala sookoha sinci-ene. Vano okathi woottharelana sinikaiwaaya, nto Munna Neville onoohimya muraatiyuni wira kinrowa okhala vaava, nyuwo mulepe sookoha sanyu, wira nyuwo ni miyo nivaanyihane. Munimwiira? Vaareera.

295 Koosuwela wira kihixuttiha mwaha wa nthiti na alipa-oowaarya. Kihixuttiha mwaha wa oMuluku wuulupale wa Yesu. Kihixuttiha mwaha wa olipa wa mulipa-oowaamini, ni okhalihwa khalayi ene, otthommwa, ni sinci-ene sa itthu seiyo. Yeeyo, kinsuwelaaka, mmuthukumanoni mwaka khareere alipa ootthariha ikano anci-ene, yeeyo ekhanle yoolikana saana. Voomalela. Masi, vano, itthu, miyo ka namatthariha ikano,

nave, ni ka muKalviino. Miyo kinimwaamini Bibilia paahi. Ti yeeyo tu.

²⁹⁶ Vano, vakhala wira kamosa-kamosa, wa sookoha iyo. Ni kiiixuttiha sa iyooniheryo, miyoonelo, ni sikina, ni itthu iyo sothene mukhanlyaanyu ohiiraanaka. Vano ohiyu uwo omosa, khino, nrowe niirihe. . .

Munimwaakuva wira mutthikele owela va? [Munna Neville oniira, “Nnari.”—Mol.]

Nrowe nikhalihe Namararu ohiyu, Namararu ila enrwa ohiyu, nto miyo—miyo kinoona wira—miyo kinoowerya okhalana yeeyo nto. Muruuhe yookoha anyu Namararu ohiyu, mpwehe vaplataforma va, ni yookoha ya Bibilia, vaareera, wa ele miyo kiiixuttihaaka vano. Nto Namararu ohiyu. Vano nto Ettiminku yootharelana, nto, kinoona wira ki—kihaana okhala oChicago, khula enamuna. Nto miyo kinrowa okhuma weiwo mpakha oMichigan. Apwiya yatthuna vale, kinookhala vaava Namararu ohiyu, wira kiphavele waakhula yookoha vooreeraxa sinwery’aka. Nto vano Apwiya emoriwe ikharari.

Vano nrowe nuuramihe muru, okathi vakhani paahi.

²⁹⁷ Vano, Apwiya oottottopeliwa, ela esukeryo Anyu yuulupale. Eyo ekereja Anyu. Ti Nyuwo, Pwiya, muneettiha, ni hiyo ninthuna neette ntoko Erooho ya Muluku enneettihaaya. Nto hiyo ninvekela vano wira Nyuwo munireerihe. Ni okathi onuuluulaahu Mutthak’ola, n’ukela mwa itthu iya soowiixerya, ninvekela wira Erooho Yoowaarya enuupululele seiyo siiso ntoko simphavel’ahu. Vano hiyo ninvekela mwa Nsina Nawe. Amen.

²⁹⁸ Vano, oh, miyo. . . Eliivuru ila y’aHeperi, miyo kinifayiha ntoko emosa wa Iliivuru suulupale.

²⁹⁹ Ohoolo vakhani, pooti okhala wira miyo—miyo kikhalanaka. . . kirowaka ilapo s’okhopela, yo wii, Muluku atthuniherya vale, kinookhala kiiraka vahilekenle. Kihaana orowa wAfrika vootthariha yoowoona. Kinoona wira nkinkhalakhala kikelelaka ohoolo mmithukumanoni mwaka mpakha kirowe wAfrika ni kimaliherye yoowoona ele. Vano, nto, alakela eyo enrowa okhala ephovo ela enrwa.

³⁰⁰ Masi muhina m’okathi yoowo, kaatthuna kikuxe-tho eliivuru ekina emosa y’aHeperi, ekhanle, kapiitulu 11 y’aHeperi, n’ukhala esumana yoophiyaka emosa mukapiituluni 11, ni okuxa khula mmosa wa mikhalelo seiyo wala atthu, ni wooniherya mukhalelo aya. Munnona? “Mwaha wo waamini, Nowe,” ni okuxa makhalelo a Nowe. “Mwaha wo waamini, Abrahamu,” nto okuxa makhalelo a Abrahamu. “Mwaha wo waamini, Apeli,” nuumala okuxa makhalelo a Apeli. Munnona? Ni otthikela siiso. Yaamoosivelani yeeyo? [Muthukumano oniira, “Amen.”—Mol.] Oh, eyo yaamukhala, hiyo naammukuxa Bibilia othene nto. Vano nto ninimwehererya yeeyo, khino, nnari, wira, esumana emosa wala mahiku muloko a

mithukumano, muthukumano mmosa ottharanaka ni mukina, ntoko muhakalaliho, okathi uwo muhina mwa mahiku a niira na Natale, wala etthu ntoko yeeyo, Apwiya yatthuna vale.

³⁰¹ Vano, kapiitulu 7 y'Eliivuru ya aHeperi, hiyo noomphwanya Mutthu ula muulupale. T'ani onwerya okileela nle naari Nsina Nawe? [Muthukumano onira, "Melikhiseteki."—Mol.] Melikhiseteki. Vano, T'ani aari Melikhiseteki ula? Owo aari namukuttho a Muluku A Wirimurimu. Owo aari Mwene a oSalemi, yoowo aari Mwene a oYerusalemu. Owo khaarina hata tiithi awe, wala Owo khaarina hata maama. Owo khaarina okathi aatonko awe oyariwa, nnakhala Owo khonrowa okhalana okathi onrowaawe okhwa. Vano, hiyo ninnoona wira ohaana okhala Oohimala.

³⁰² Hiyo nihoona wira nuulumo *mahiku othene* enihimya "evirelo y'okathi." Nyuwo nlelo munnuupuwela yeeyo? Evirelo y'okathi, eyo ti mahiku othene ni mahiku othene. Nto *mahiku othene* ennikhalela onamoona, imaara sinci-ene, mBibiliani ntoko "e—evirelo y'okathi."

³⁰³ Masi, Ehinimala, ni eri enamuna emosa paahi ya Ekumi Ehinimala, hiyo niphwannye-ahu. Eyo ekeekhaii? Muluku t'orina Ekumi iyo Ehinimala, meekhaawe. Eyo ekeekhaii? Muthinto mmosa paahi wa Ekumi Ehinimala. Khanivo hata nuulumo ntoko "ehukumu Ehinimala." Okhala wira, nyuwo mwarowa ohukhummwa wa Ohimala, nyuwo muhaana okhalana Ekumi Ehinimala wira muhukhummwe Voohimala. Nyuwo mwaahaana okhalana Ehi-... Nto nyuwo mwakhalana Ekumi Ehinimala, khimukhanle ohukhummwaka, moone, nyuwo mwarineene Ehinimala. "Ole oniiwa Masu Aka, ni onimwaamini Ole okirumme, ookhalana Ekumi ehinimala." Eyo ekeekhaii? Ekumi Ehinimala, okhala wira munnaamini. Ahe, nyuwo mwakhalana Ekumi Ehinimala, khamukhanle ohukhummwaka, okhala wira mookhalana Ekumi *Ehinimala*. Tivo, nto, vakhala wira munrowa ohaawa omooroni mahiku othene ni mahiku othene, muhaana okhalana Ekumi Ehinimala.

³⁰⁴ Masi, vano, kinnaamini wira Biblia onniixuttiha omooroni w'ekeekhai onvarela. Biblia onniixuttiha eyo, wira itampi ni otakhala sinoohukhummwa, mahiku othene ni mahiku othene. Eyo kahi Ehimalelo, vano. Eyo khino enookhala wa iyaakha ipilyawu muloko. Pooti okhala wa iyaakha ipilyawu emiya, masi okathi uwo sihaana okhalana emalelo. Okhala wira, sothene saarina epacerelo, sookhalana emalelo. Ti itthu iye sihirina epacerelo, sihirina emalelo.

³⁰⁵ Munnuupuwela nisomi nenlo vano? Moota naatthikenly'ahu ottuli khuphwanya wira sothene saarina epacerelo saaroononiwa, moone, ohononiwa wa ele yoopacerya. Nto, vookiserya, entthikela wa Ehimalelo. Vano nto omooroni wothene, ohaawa wothene, ni muupuwelo wothene wa yeeyo,

sinoomalamalihiwa wa Ehimalelo. Itthu sothene sipacenrye, sinnimala.

³⁰⁶ Nto Melikhiseteki ula khaari Yesu, maana Owo aari Muluku. Nto etthu yaamukhalinhe Yesu ni Muluku oovirikana, okhala wira, Yesu aari Empa Muluku aakhanlaawe-mo. Munnona? Vano, Melikhiseteki. Yesu aahikhalana oowanli tiithi ni maama. Nto Mulopwan'ola khaatonko okhalana tiithi wala maama. Yesu aahikhalana epacerelo ya ekumi ni Owo aahikhalana emalelo y'ekumi. Mulopwan'ola khaarina tiithi awe, hata maama, hata opacerya wa mahiku wala emalelo y'ekumi. Masi, Owo aari Mutthu mmosaru. Aari, Melikhiseteki ni Yesu aari Mmosaru; masi Yesu aari erutthu ya vathi, aayariwe ni aapakiwe etampi. Erutthu ya Muluku Mwaneene, mwan'Awē Yoowo, ooyariwa ni aapakiwe etampi, wira okumihe mpunu wa okhwa, wira oliverye woopola, ni owaakhela aana alopwana ni athiyana wa Yoowo. Munniiwa? Mwaha wa yeeyo Owo aarinaawe—Owo aarinaawe epacerelo, Owo aahikhalana emalelo.

³⁰⁷ Masi erutthu ila yooloka voomalela, wa otthapela, ntoko—ntoko neemexeryo na ohihimuwa wahu, Muluku khaarowa ohiya erutthu iyo yoowaarya wuntta, okhala wira Owo t'apattunxe Mwaneene. Khuruuha, khuhihimuxa, khuhela moonno Awe woolopwana.

³⁰⁸ Nto, olelo, Erooho Yoowaarya yeeyo ehiihimunxe erutthu iyo eri vaava Mukereja. Nittotopeliwe Nsina n'Apwiya! Ni yooniheryaka miiriirya imosaru ni owerya. Nto nihiku nlo Erooho Yoowaarya ela, eri Mukereja, enookhuwela ni enoowela osulu, enimwaakhela mwa yeeyo mukhalelo yoola wa erutthu ekilaanthe moonno woolopwana wa Ehice ya Muluku, wira olapeleke mwaha wa hiyo anatampi. Nto mwa Vaavo hiyo ninnikhalihwi voolikana voomalela oohikhala etampi. Kahi wira hiyo khaniniira etampi; masi ookhalihwi oohikhala etampi, Ohoolo wa Muluku. Okhala wira, wookhala mukuttho w'Ephome omphwanyaneya eriyari ya miyo ni Muluku, eriyari ya nyuwo ni Muluku. Mwaha wa yeeyo Owo ohimmy'awe wira, "Mutthu oniyariwa ni Muluku, khoniira etampi, owo khokhanle wiiraka etampi." Maana, mwayariwa vasya, Erooho Yoowaarya yeeyo yaakhala mw'Erutthuni memmo enkhala mwa nyuwo. Ni Eyo khekhanle wiiraka etampi; mukuttho omphwanyaneya ohoolo Wawe. Nto nyuwo mwaairaka vootthuna, enooniherya wira khinweryaneya nyuwo okhala mw'Erutthuni mwemmo. Amen. Eyo ti Ehapari yooreera. Eyo eri vo.

³⁰⁹ Tivo, moone, Eyo khenivirikanya hata emosa wa Soolempwa. Eyo ennitthuka Soolempwa vamosa. Munnona? "Yaamukhala yoohiweryaneya w'ale yaatonko omwaleeliwa." Ti vaavo onrowaaka waakhela sookohiwa saka. Maana, mukoheke, ti siiso sintthun'ahu.

310 Vano nwehe. “Khinweryaneya w’ale yaatonko omwaleeliwa, khumora ohokolowela-tho orukunuxa murima, woonaka wira annimukhomela-tho Mwaana a Muluku, ni omukhalaha Owo . . . omuulihaha-tho muru v’atthuni.” Awo khiyaawerya wira.

311 Vano murowe mwa aHeperi 10, vaavo Eyo enihimy’aya vo, “Okhala wira naakhanyereryaka wira etampi vootthuna nimanle-ene waakhela osuwela w’Ekeekhai.” Nto etampi exeenii? Ohaamini.

312 Nyuwo volakela moonaru Erooho Yoowaarya wira itthu Eyo yiiralyaaya va voosiis’ula, ni wona wira Kristu oohihimuwa mw’alipa-ookhwa, ni Owo onkhala Mukereja mw’Awe ni eriyari y’atthu Awe, nto nyuwo vootthuna khunakhootta Eyo, khinweryaneya nyuwo ophiyererya orwa wa Muluku, okhala wira mooveeha Erooho Yoowaarya.

313 Yesu ohimnye itthu imosaru, okathi Owo aapakaawe miiriirya iye.

314 Awo yiirale, “Vano, Owo ti Pelizepuli. Owo nahako. Owo xetwani.”

315 Yesu khurukunuwa, khwira, “Miyo kinimoolelevelani mwaha wa yeeyo. Masi okathi Erooho Yoowaarya enrwa’aya ni wira, olavula nuulumo nimoso nooveeha Yeeyo khenkhalakhala eleveleliwaka olumwenku ula wala olumwenku onrwa.” Okhala wira nyuwo muhihana Erooho ya Muluku yaari mwa Yoowo, “erooho yootakhala.”

316 Vano, naairaka etampi vootthuna, naairaka etampi, ohaamini vootthuna. Kahi nuumala waakhela Ekeekhai, oyariwa vasya; khinaakhanle wiiraka etampi nto. Natampi khokhanle wiiraka yoochile- . . . muKristu khokhanle wiiraka etampi yoochileveleleya. Owo khokhanle wiiraka. Ti ole ootakhala oniira eyo. Ti ole oowiipaka waamini, kahi mulipa-oowaamini.

317 Marabbi ale aYuta, oh, awo yuupuwela wira yaari oowookololowa, ni awo yaahikhalana D.D. ni aPh.D. Awo yuupuwela wira yaahisuwela saana sothene, mmurupani, masi awo yaari anatampi ootepaxa. Oh, awo khino . . . Khimwaakhanle oohela ntata mma—mmakhaleloni mwaya. Awo yaari ooloka, oolakeya, ni anaxariya, siiso. Masi awo yaari alipa-oohaamini.

318 Nto nyuwo mukuxe nuulumo etampi nto musuwele etthu enihimy’aya. Nuulumo *etampi* nnihimya “ohaamini.” Ari makhuru maili paahi, okhanle, mulipa-oowaamini wala oohaamini. Eyo ti, mutthu okhalihawe naxariya wala natampi. Ti yeeyo tu. Nyuwo mwakhala oohaamini, nyuwo mwa natampi; hata wira mureenre murima sayi, munrowa okereja sayi, wala hata mukhalaka mulaleyi. Nlelo mwa mulipa-oohaamini.

319 Afarisi ale yaari alaleyi, ni awo yaari oohaamini, ni olelo ari omooroni olelo mwaha wa yeeyo. Anatiini saana ntoko saaweryaaya okhala, ni oothunku, masi awo khiyamwaamini Owo. Vano awo yaamwiihanne “xetwani,” khuvaanyiha Masu Awe. Nto akina wa awo khwira, “Nyuwo mwaari yoowo, vano mukhuruwe vamwiikimanyo. Mpake mwiiriirya. Nrowe niwooneni mpakaka.” Mmosa aahimmana Owo vamuru, ni ekopo, khwira, “Mulaleerye ni munleee oomanneni, nyuwo profeta, nto hiyo ninoowaaminini.” Moone, oohaamini! Awo yaamwiipaka wira awo yaari alipa-oowaamini, masi awo yaari oohaamini, oohiyariwa vaneenli, oovalaanyiwa, anaamwi yaari ooreera murima ni oothunku.

320 Nlelo, etthu ene yeeyo emosaru ennikhala olelo. Alopwana ni athiyana anniwerya orowa okereja ni okhalana ethoni yooloka, ni—ni oothunku sinweryaaya okhala, ni oohitoko wootha, wiiya, ni ophavela otthara etiini aya vooreeraxa ntoko sinwery’aya. Masi, voohikhala wira awo alipa-oowaamini, aapweteya. Tivo khanivo hata nlepa wa atthu ootthariha ikano mBibiliani. oKalvino ti . . . Mahala t’ile Muluku owiireny’aweni, ni miteko ti etthu enimwiirelaanyu Muluku. Ti soovalaanyana voomalela.

321 Nyuwo mwahiya wootha, ohiya onvura sikaro, ohiya wiiya, ohiya oraruwa, ohiya sothene, muhiira sothene, mootthara sooruma, ni moorowa okereja, opatisiwa khula Ettiminku, muhaakhela ekomunyawu, moorapiha inawu sa masantu, muhiira sothene, muhaavoniha aretta, ni muhiira itthu iya sothene sikina, voohikhala wira muyariwe ni Erooho ya Muluku, oothanliwa, moopweteya. “Kahi ole onthuna wala ole onthimaka, masi Muluku ommoriwa ikharari.”

322 Esawu aahiilipiha saaweryaawe wira akhale muKristu, nave khaawenrye wira. Bibilia ohimnye wira owo aahinla vooriipiha-vo murima, aphavelaka nipuro n’orukunxa murima, nave khaawenrye ophwanya. Owo hata ohinatthi oyariwa, Muluku aahimuhukhumu okhala wira Owo aanisuwela wira aari nawootothe mmurimani mwawe. Muluku mwa osuwela khalayi ene aahisuwela eyo. Owo khwira, “Kinnimpheenta Yakope, ni kinnimunyokha Esawu.” Nto Esawu aakhala ntoko mutthu ooreera murima. Owo aakhalaka owaani, aakhapelelaka atithi awe oowuuluvala yahoona, aanilyiha inama, ni sothene, aari mmiravo ooreera murima.

323 Nto Yakope aari mmiravo a amaama, nawoothe ookenyeya. Ti yeeyo owo aary’awe. Nyuwo muhaana okupali iyo. Bibilia onnikupali, onnihimya. Aatthimakasa, airaka itthu sothene. Nto—nto, maama, aapharelelaka amaama. Masi, nnakhala vo, Yakope, ni s’osulu sawe ni vathi sothene, ni inamuna sawe s’okenyeya, owo nlelo aahikhalana nttittimiho w’eyuulupale ele. Eyo ti entthuneya.

324 Esawu aari vaara vaili ooreera murima onvikana Yakope. Vaakhanle wira hiyo naahaana omulamula olelo, wira okhale mepuru a mukereja mwahu, mwammukuxa Esawu, ekonto emosa wa mmosa, nyuwo mwahaamusuwenle. Masi Muluku aamukunxe Yakope.

325 Mwaarowa wira exeeni ni Paulo Oowaarya, vaakhanle wira owo aatthuna okhala murumeyi? muYuta mmosa, a ephula yookhoropana, ni eyano awe yoothetemanela epante emosa, kweekwe onyakulihanaka, ni moota owo onrowaawe opwexakasa Ekereja, onrowaawe wira sothene. Mwaamuupuwela wira owo oirale etampi yoochileveleleya, masi Muluku irale, "Owo murumeyi Aka."

326 Muluku onaakuxa atthu ni waakhaliha oovirikana, kahi atthu animukuxa Muluku ni okhala oovirikana. Muluku onimukuxa mutthu khimukhaliha oovirikana. Kahi ele muniir'anyu, ele entthunaanyu, ele enuupuwel'anyu. Ti ele Muluku eniir'awe. Eyo eri vo. Nto owo t'okhanle wahala ene.

327 Vano, Melikhiseteki ula muulupale, wahala xeeni mwaha wa Yoowo va! Ninthuna nisome vakhani, ntoko paahi. . . naahaana ovira mwa yeeyo naakuvaka saana. Ninrowa otthikela ottuli nno nipuro nimosa na Soolempwa, nto ninrowa opacerya ntoko eversiikulu 15.

Nto nlelo...ennitepa osuweliwa: wira vale... mwaha wa ole onlikana ni Melikhiseteki onimoorwa namukuttho mukina.

328 Vano, Melikhiseteki aari Namukuttho. Aari Yoowo? Va ti yeeyo Owo aary'awe. Hiyo ninnoona wira Muluku, wopaceryani, aari ephattuwelo yuulupale ya Erooho. Eyo ekeekhahi? Owo khaarina hata nipuro nooyariwa-vo. Owo khaarina hata nipuro nookhwa-vo. Owo khaarina hata opacerya wa mahiku. Owo khaarina emalelo ya miyaakha. Owo aari paahi ntoko Oohimala ntoko Ehimalelo eryaaya Yoohimala. Owo khonatoko oyariwa. Owo khonatoko okhwa.

329 Nto mmo, hiyo ninnoona wira, Owo aahikhalana ivirikanelo thanu na piili sa Erooho. Eyo ekeekhahi? Bibilia oohimya, mwa Wiisuupulula, wira, "Irooho thanu na piili ohoolo wa Ehice ya Muluku." Eyo ekeekhahi? Thanu na piili, sa inamuna sinciene, Erooho ya inamuna thanu na piili. Hiyo ninnoona wira, aakhala makhuli mathanu na maili. Wookhala okathi mithanu na miili wa ekereja vo. Oh, eyo ennilikana paahi. Thanu na piili ti omalela, ni Muluku aari oomalela. Ni Irooho thanu na piili, ni Irooho iyo saari soolikana voomalela. Yoopacerya yaari ya nikhuli nooxeerya; ophenta wooloka voomalela, ovuluxiwa. Ni moota, vaakhanle wira naahikhalana okathi, wo oromola makhuli awo ni wooniherya wira khula nimosa na yaawo ninthoonyerya oloka wa Muluku. Amen. Makhuli awo, ari makhuli mathanu na maili eephattu. Makhuli awo anthoonyerya

oloka wa Muluku. Ni ma . . . Makhuli awo anthoonyerya mawoko a Muluku, eyirelo ya Muluku. Makhuli awo mathanu na maili, yaathoonyerya okathi mithanu na miili wa ekereja, ittheneeri thanu na piili, malaikha mathanu na maili. Mwa Soolempwa sothene, arumeyi athanu n'aili, anamitthaka athanu n'aili, mitthaka mithanu na miili, sothene mwa thanu na piili. Mahiku mathanu na maili. Mahiku mathanu na mosa, nto na neethanu neenli ti esabbath; oloka voomalela, omalela. Oh, ti yooreera, naarina paahi okathi wo okela mwa yeeyo ni wooniherya, makhuli awo!

³³⁰ Mukuxe nikhuli nooxeerya. Nikuxe nikhuli noopacerya, ti nooxeerya. Oxeerya exeeni? Oxeerya ethoonyeryo ya woopiha. Oxeerya ethoonyeryo ya nvuluxo. Nto nyuwo mwaweha yooxeerya ovira mwa yooxeerya, nikhuli xeeni? Nootteela. Eyo ti yoolikana. Tivo okathi Ephome yooxeerya emwaraxiwaaya, wira ekhuneele etampi yooxeerya, Muluku, awehaka ovira mwa Ephome yooxeerya, khuweha etampi yooxeerya, eyo enkhalala yootteela. Mulipa-oowaamini khokhanle wiiraka etampi. Vekeekhai nnari. Epyo ya Muluku, iparakhaka sa Muluku, sinkhalala mwa yoowo. Muluku khonwerya woona hat'etthu woohikhala Ephome ya Mwan'Awe. Hata ekhalaka xeeni Mukereja mw'Awe, enakhaleru exeeni, Muluku khonoona, okhala wira Yesu onnilapela, voohihiyererya, Namukuttho Muulupale. Khiivo enamuna ya owo wira etampi, okathi Mukuttho onkhalaaya vale mwaha wa yoowo, siiso. Vekeekhai nnari.

³³¹ Nto vano nyuwo mwaira wira, "Ahe, eyo ennikivaha okathi wooreera . . ." Nto eyo enooniherya wira khamukhanle oratta-ene.

³³² Nyuwo munooxukhurela Yeeyo. Munooophenta Eyo, mwakhala muKristu eekeekhai, mpakha nipuro etampi yaarowaaya woothukumelihani murima mwahaakhanlyaanyu wiiraka. "Okhala wira Epyo ya Muluku enikhala mwa yoowo, ni khokhanle wiiraka etampi." Bibilia ohimnye wira, "Mutthu amalaru orapihiwa ni Ephome ya Yesu, khontthuna-tho etampi." Mwakhallana otthuna, murima anyu, khokhanle oratta-ene ni Muluku.

³³³ Vano, munoovonya, masi khamuniira vootthuna. Munnona? Muni—munireiwa ntapha, nto etthu munreiwaanyu ntapha, wala etthu muniiraanyu muhinlakelaanyu wira, kehiyo etampi nave, munoorukunxa murima minuutu ene yoowo munoonaanyu wira moovonya. Munoorukunuwa naanaanoru mwiire, "Nkilakenle . . . nkoonale eyo." Munoohimya eyo, ekumi yothene. Mutthu khontthuna okhala siiso, tivo hiyo nikhanly'ahu oophepuwa ni mw'epiphini, mulaponi mu, mwemmo mukhanle elivelo ya Ephome wa hiyo, okathi wothene, wira enikhaliheke ookhuneeliwa. Okhala wira, ovonya woopacerya hiyo ni . . .

334 Vano, vo t'uri muupuwelo anyu wa ootthariha ikano. "Oh, moosuwela? Muthiyan'ole aari ooreerihiwa. Masi, attottopeliwe Muluku, owo oovonya. Miyo koosuwela wira ootthikela ottuli." Ti yoovonyeya. Owo khotthikenle ottuli. Owo oroovonya. Vakhala wira oirale vootthuna, weeso khaari oratta-ene, opacerya wene.

335 Vakhala wira kholakenle wira, nto onarowa ohoolo wa Ekereja yoowaarya ya Muluku n'ulapa, ni wira, "Koovonya, ni mukilevelele," muhaana wira. Mwaahiireke ni murima anyu, weeso yeenyu mwaahaana orowa waltaari. Ekeekhai. Yookhala ereerelo murima y'ekeekhai mukereja. Yookhala ereerelo murima yooloka, kahi ereerelo anyu murima, masi ya Kristu.

336 Miyo nkirina ereerelo murima yo oruuha wa Yoowo. Masi miyo kinroromela Wawawe, oh, mahala Awe, ni kookhalana mmurimani mwaka. Nkaaphwanela, khiivo kaakhanlyaaka wiiraka wira kiphwanele, masi ni mahala Owo ookiihana khukilattula wira kirwe. Vano miyo khunweha Yoowo, vano Owo khukumihya otthuna mwa miyo. Miyo kinniira soovonya ikonto sene khula mweeri, khula eyaakha. Vekeekhai, kinniira. Masi koonaru wira koovonya, miyo kiniira, "Muluku, miyo nkilakenle wira, Nyuwo munnisuwela murim'aka. Nkilakenle wira eyo. Kaareiwe ntapha mwa yeeyo. Nkilakenle wira eyo. Nyuwo mukilevelele, Pwiya."

337 Vakhala wira kiroonvonyerya munn'aka, miyo kiniira, "Munna, mukilevelele. Nkaalakenle wira siiso. Vekeekhai, Muluku onnisuwela murim'aka."

338 Oh, eyo vo. Vo ti vari mukuttho w'Ephome. Vo ti vari owerya wa Ehapari yooreera, Ekereja ele yoowaarya ekelelaka ohoolo. Kahi mwaha wa etthu mwiiraly'anyu; enkhala etthu muhirinaanyu-vo etthu. Vo ti vari Ettipiheryo.

339 Vano, Melikhiseteki ula, okathi Owo orwiiyaawe.

340 Kintthuna kooleleni etthu ekina. Mootoko okuxa ni-nipattuuxa na eviituru na malootho mararu? Mukuxe nipattuuxa na eviituru nirina malootho mararu, muhelele wira nsuwa niweryeke omana, ninookumiherya makhuli mathanu na maili oolikana voomalela. Nipattuuxa na eviituru na malootho mararu ninookumiherya ekhweyi. Eyo ekeekhaii voolikana. Vano, vaakhanle wira naahikhalana okathi, naamukela mwa yeeyo. Tthaaru eniruuha oloka voomalela: Tithi, Mwaana, Erooho Yoowaarya; okhalihwiwa naxariya, oreerihiwa, opatiiso wa Erooho Yoowaarya. Eyo eri vo. Oloka voomalela onrwa ni tthaaru. Muluku, vasulu va mutthu; Muluku, mwa Mutthu oniihaniwa Yesu; Muluku, Mukereja. Vano, oloka voomalela.

341 Mutthu aahiira etampi, okathi Muluku aaryaawe osulu nno Munripuni na Mooroo. Muluku. . . Mutthu aarimwiira etampi, kiireke, ohoolo wa Muluku, okathi Muluku aaryaawe Munripuni

na Mooro, okhala wira owo nlelo aari yoopattuxiwa yootakhala, ephome ya enama yaari ohoolo Wawe.

³⁴² Vano Mwaapwittipwitthi a Muluku aahirwa, nivalo na neenli noomaliherya na Muluku; Muluku mmosaru, muteko mukina. Vano nto Muluku ula mwa... aari mwa Kristu, aari Muluku mmosaru yoowo aari Munripuni na Mooro. Nto Muluku mmosaru aaipanke erutthu khukhala ni hiyo. Vano nto mutthu khimunyemula Owo, nnakhala vo aari oowaakhula mwaha wa yeeyo. Khiyaakhanle hata Ephome yoomwaraxiwa nlelo. Ti yeeyo. Yesu khwira, “Miyo kinimoolevelelani.”

³⁴³ Masi nto Yoole aari erutthu, khukhala-tho Nripu na Mooro. “Miyo kikhumme wa Muluku. Kinrowa wa Muluku.” Va hiyo ninnoona wira Paulo aahikumana ni Yoowo, arowaka oTamasiku, Nripu nenle na Mooro. Hiyo ninnimoona Petru akumanaka ni Yoowo mukhatteya, Nripu nenle na Mooro. Vekeekhai. Ni ninnimoona Owo olelo, eriyari ahu, Nripu na Mooro nenlo.

³⁴⁴ Masi oloka woomalela woophiyererya nipuro, wira Mutthu a eriyari... Vano, yakhumelela okhala muYuta va, wala mutthu mmosa onsuwela saana Waataana wa Khalayi. Wira ooniherye, mukihye kiwooniheni. Miyo nkirina Waataana Wa Khalayi ni miyo, naanaano va. Ola ti—ti Waataana Wa Naanaano. Masi woovahani wa mukatthe woohikhala miropo waakhala muthaaluni wa mukatthe wooreerihwa, mwa mukuttho w’aYuta wooreerihani wa maxaaxa; mmukohe khula muYuta; mwaha wa mapattuuxa ale mararu a mukatthe, nipattuuxa n’eriyari naahipwexiwa. Ole aari Kristu. Nipattuuxa n’eriyari naahipwexiwa; Kristu, ole eeriyari. Yooniherya wira waahaana okhala okherakasiwa, nipuro nlo, wira okhale ovuluxiwa. Nto nipattuuxa nenlo naahimmwa okhala nvuluxo, mwa mukatthe kosher.

³⁴⁵ Nto Owo ori va. Nto ohiy’ula, naakhelaka ekomunyawu, ninkawanya mukatthe kosher, maana eyo erutthu ya Kristu. Nto Owo aakherakasiwe oKalvario, wira okhale Mukuttho w’ottipiha itampi sahu, wira mwa exariya Awe hiyo niwerye okhala exariya Awe. Okhala wira, Owo ohikhaliha etampi ahu, wira hiyo nikhale exariya Awe. Munna, awo mahala ooloka. Voomalela. Khiivo enamuna, hata enamuna ekina munweryaanyu okhaliha naxariya.

³⁴⁶ Vano, Melikhiseteki ula, Mutthu ula muulupale aakumananiwe mphironi, owo aahimuliva, Abrahamu aahimuliva sanamuloko Yoowo. Mutthu zeeni muulupale Owo aakhanly’awe okhalaka! Vano nwehe, voowaakuva.

*Yoowo okhalihwe, voohitthariha ikano sa...
sooruma sa erutthu,...*

³⁴⁷ Vano munnoona malamulo awo ootthariha ikano? Ikano sihimmye wira, “Muhiive. Muhiraruwe. Muhiye.”

³⁴⁸ Yesu khurukunuwa naanaanoru, khwira, “Aahimeeriwa ale khalayi, ‘Muhiive,’ masi Miyo kinihimya wira ole oninviruwela munn’awe, vahi nthowa, oomala omwiiva. Aahimeeriwa wira, ale a khalayi, ‘Muhiraruwe,’ masi Miyo kinooleelani wira, ole oninweha muthiyana anwereihaka murima, oomala oraruwana muthiyana owo vamurimani vawe.” Eyo eri vo. Eyo ehaana owiixuttiha athiyana moota wo owara, moota wo wira ele eri yooreera. Nyuwo munwara voohireera, ni owiriha alopwana woowehani mwa enamuna yoonanara, mootheka mwaha wo oraruwa, voolikana ntoko wira muhiira etthu ene. Yesu ohimmye siiso.

³⁴⁹ Ni nyuwo atthu murina iviruwelo iya ntoko nimetto na sarothi, kweekwe munaakhulana ni mutthu, muhinwerya ovilela, n’itthu ntoko seiyo. Mwiikasoope. Nyuwo mootheka mwaamulavulelaka nuulumo noonanara munn’inyu nihikhanle nooreera, nihikhanle nooloka, orowa ni ohonona nttittimiho. Khivanthuneya nyuwo ohoma ni mwaalo ottuli wa mutthu wira mmwiive. Nyuwo pooti ohonona mukhalelo awe ni omwiiva, wiiva ovara wawe murima. Omulavula voonanara pastore anyu va, omuhimiyana etthu yootakhala, yaamukhala ntoko nyuwo omoopela. Omuhimiyana etthu yahaari yooloka, ahe, enimwiiva ovara wawe murima w’atthu ni itthu siiso, nto munootheka mwaha wa yeeyo. Ti yeeyo Yesu ohimaly’awe.

³⁵⁰ Vano, nwiriyane va, etthu—etthu Paulo aaphavelaawe ophiyerya va. Kinnimphenta Bibilia ola a khalayi. Owo onniwookololani. Nkawehani, oh, nkawehani va paahi. Vano, naasomaka yaneexexe-... “Ti...ennitepa osuweliwa wira Pwiy’ahu aahikhuma wa Yu-...” Mulipelele, kookupali wira kookhalana eversiikulu ekina va kaarowaaka osoma. Nnari, vaava va 16.

*Yoowo okhalihwe, voohitthariha ikano sa...
sooruma sa erutthu,...*

³⁵¹ Eyo ti ya nlamulo, moone. “Oh, munna, miyo—miyo nkaakhanle. Nkaakhanle. Koosuwela, masi miyo...” Kahi yeeyo. Ti ophenta oniira eyo.

³⁵² Moota nivinryaahu mwa yeeyo! Miyo khwira, “Kaaleenle-ru awaka...kiniwaavya amwaar’aka, ‘Oh, ahe, miyo—miyo—miyo kaanitthuna kikkhalanne axaara aili. Kaanitthuna kikhumaka ni *ola*, okhala ni *ola* vale. Masi, kaira vale, amwaar’aka anookimwalana, ni an’aka anookhala mu...Muteko aka waampweteya.” Nyuwo ootakhala, namirima miili oowunta. Ti yeeyo. Nyuwo khamunimphenta owo oratteene, opacerya wene. Eyo ekeekhahi voolikana.

³⁵³ Vaakhanle wira mwaanimphenta, khiyaarowa okhala hata ekano wa yeeyo. Mwaamumphenta, khula enamuna, ni mwaamukhala ni yoowo. Eyo ekeekhahi voolikana. Ni nyuwo athiyana munoowiirela etthu emosaru aiy’anyu. Ti yeeyo.

354 Imaara sikina athiyana anniphiyerya nipuro, wala . . .

355 Alopwana anoomoona Yesapeli mwaamukhaani othene oowiiptari, moosuwela, nto—nto nyuwo munoorowa, osiveliwa ni yoowo; khino mookhalana mwaara ooloka. Vano nto nyuwo muniisihana muKristu. Wuuliha muru. Munniphavela ephimelo ekina ya waltaari. Ti yeeyo.

356 Nto akina a nyuwo—nto akina a nyuwo axithiyana muninweha mmiravo mmosa ni maihi awe oovasiwa, Vaseliina oophiyerya mmo wira . . . otthukula eyano awe. Nto vo nyuwo . . .

357 Mwaaruusi mmosa, nno woohikhala khalayi . . . Ela kehiyo eperwa, okhala wira nkinthuna woohimeeryani ntoko eperwa. Masi atthu annisuwela wira nla khanihiyo nipuro no woopavo iperwa. Masi mwaaruusi mmosa nno, owo . . . Yaahikhala aximiravo ooreerela va, amiravo aKristu. Okathi ovinre khalayi, okathi waarumeelaaka va, naanikhalanaka masomi a amiravo paahi. Nto kaanilavula n'aximwali Ttiminku oxekuwa, mwaha wa olopwana ni othiyana ni itthu. Vano Ettiminku yootharelana oxekuwa, olavula ni amiravo, ni ophavela olakiherya itthu iyo.

358 Mwaaruusi mmosa khupacerya okhuma ni muhureyi uwo, eriyari wa epooma nno, aanaavura asikaro ni aahikhalana esuupha yaamukhaani mpoolosani mwawe. Ni aaneetiha ekaaro yaamukhaani yo wiikarana opooma. Nkaawerya woona etthu owo oonalyaawe mwa mmiravo ole. Owo khaarwaaka okereja. Owo aakilaathiki vate vale. Aammuruuha okereja nno, vano nto owo aakilaathi vale vate, mukaaroni mwawe, n'ulipelela, khaavolowa mukereja. Miyo khumwiirela nihiku nimoso. Owo aakhalaka oNew Albany. Miyo khwira, "Kintthuna kookoheni etthu emosa, mwaaruusi. Munoono exeeni mwa mmiravo ole?" Miyo khwira, "Yoopacerya, owo onninyokha etiini ene yeeyo nyuwo—nyuwo murinaanyu. Owo onnimuthanya Kristu anyu. Owo khonrowa okhala iy'anyu. Owo onoorowa wookhalihani ootakhaliwa, ekumi anyu yothene." Nto miyo khwira, "Ahe, aakhala aximiravo ooreerela aKristu nno mwaakhanlyaanyu osivelanaka. Ni atithi anyu ni ame anyu annithanya wupuwela wira nyuwo munookhuma, masi nnakhala vo munookhuma, ni munuupuwela wira, 'Miyo kirina miyaakha muloko ni mithanu na mosa.'"

359 Owo khupacerya wootta itthu so wiipintari ni weettakasa, nto yoopacerya, owo aari ipa muniiniwa. Owo oorowa wa Ohimala vano. Masi, nto, owo aaheemela va. Nto moosuwela ntthyawelo mwaaruusi ule aakileenle-awe ottuli iwe, etthu aamphetamineleawe mmiravo ole? Owo airale, "Owo orina inawu sikhaani sooreera, ni oninkhela vooreera." Mwaamuwerya otthokelela yeeyo? Aisinkhelihaka othene owo, owo nikenyeya, kahi mulopwana.

360 "Nkawehani," miyo khwira, "murokor'aka, kaamwamputi okhuma ni mmiravo muKristu ookhalana inawu ntoko ikaaro

sa kokotto ni wunkha ntoko paakha a mutakhwani, aakhanle-ru muKristu oomalela.” Ti yeeyo. Ekeekhai. Ayo.

361 Nlo ntthyawelo, “Inawu sikhaani sooreera, ni wunkhela vooreera.” Namweetta owo ipa siniiniwa, vookiserya aahihonona makhalelo a mwali. Ti yookhupanyerya, maxakha.

362 Othelana ti wa ntittimiho, masi waahaana okeliwa ni mavekelo ni ntittimiho. Ni omphenta vooloka muthiyana owo onoophitaaniani vamosa mahiku othene. “Entthukwaanyu vathi va, Miyo kinootthukwa Wirimu.” Mweettaka mphironi mmo, owo pooti okhala napaaxa ni wuuluvala ni okhalana mannyaari, masi ophenta weiwe nyuwo mwaarinaanyu wa yoowo okathi waaryaawe mwaamwali, muthiyana ooreera, nlelo munookhalana.

363 Nyuwo pooti omora makhata, okhalana ntari, ni wiitho wa mannyaari ni sothene sikina, masi owo onimoophentani siiso ntoko okathi mwaarinaanyu makhata owookowa ni maihi oonyokotowa, akhalaru Muluku vekeekhai. Okhala wira munlipelela okathi onrowaanyu olapuwa muro iwe, okathi onrowaanyu otthikela-*tho*, okhala amiravo ni aximwali, wira mukhaleke vamosa voohimala. Owo natiri a Muluku Ohinimala. Owo ohimye wira aamwiira. Owo, kahi yeeyo paahi, ninookelela yeeyo muhina mwa minuutu mmosa, Owo oolapha wira aamwiira.

364 Nwiryane ela, nitthikelaka.

Yoowo okhalihwe, . . . vootthariha ikano sa . . . sooruma sa erutthu, masi vootthariha owerya wa . . . ehinipweteya.

365 Vano ninrowa osoma naakuvaka, wira mwiiwe saana.

Okhala wira sinnihimya sa yoowo, Nyuwo mwa namukuttho a mahiku othene ntoko sihimyaawe Melikhiseteki.

Vaakhalakaru wira onnitthunaneya namukuttho, Owo nookhala Namukuttho.

Tivo vannisuweliwa omalihiwa wa miixuttiho sa khalayi. . . woohiroromeleya ni ohiixuttiha etthu.

Tthiri ikano khiivo ekhoomalinhe-aya, . . .

366 Khimunwerya, hata muniira exeeni. Munoohiya, owurya, ohiya onvura sikaro, ohiya wootha, orowa okereja ni wiilipiha wira *ela* ni wiilipiha wira *ele*, nlelo mwa a erutthu. Iyo ikano paahi. Ikano khinlokiha etthu. Masi exeeni enlokiha voomalela? Kristu. Ovuwa! Kaamuwerya ohiya wootha, ohiya wiiya, ohiya oraruwa, ohiya omulya soona, ohiya itthu sothene, nlelo ka a erutthu. Muluku khonaakhela eyo, okhala wira nkirina hat’etthu yoonvaha Owo ntoko ettipiheryo.

³⁶⁷ Masi okathi ene yoowo kiniixaatheryaaka matata aka vamuru wooreerhiwa wa Pwiya Yesu, ni wira, “Pwiya, miyo nkilonke. Munookikuxa ntoko murumeyi Anyu?” vano Muluku ni epeeco khuroiha ottaiwene itampi saka, kinkhala ooloka voomalela vamaithoni va Muluku. Ti yeeyo. Mwaha wa xeeni? Nkineemela mwa iphwanelelo saka yoomi. Kineemela mwa Sawawe. Nto Owo oonikhaliha ooloka voomalela, mwaha wo ohaawa Wawe ni Ephome Awe.

³⁶⁸ Kinnoona wira ola okathi wo omaliha. Masi kintthuna kimalihe kisomaka ela kawerya vale, naanaanoru.

. . . sa khalayi mwaha woohiroromeleya khisaixuttiha etthu.

Tthiri ikano khiivo ekhoomalinhe-aya, masi wooruhiwa ororomela wooreeraxa; (Exeeni ororomela wooreeraxa? Kristu.) weiwo hiyo nnimwaattamelaahu Muluku.

³⁶⁹ Mwaha wa xeeni? Mwa oreera wahu murima wothene, ni oreera wahu murima wothene, ni oreera wahu murima wothene, hiyo nlelo na a erutthu. Masi vammalaahu okhala oholo wa Muluku, nisuwelaka wira khinaakhanle oweyaka okhala vaavo, vahikhanle ni iphwanelelo paahi sa Yesu Kristu, vano ninnimwaattamela Muluku, mwaha wa iphwanelelo sa Mwan’Awe. “Pwiya, miyo kinoorwa wa Nyuwo, ni murima woohittheke. Mwa Nsina na Mwan’Inyu Yesu, xontte mukaakhele.” Oh, munna, nyuwo munoorwa ni ephiro ekumi nto.

³⁷⁰ Kahi, “Pwiya, Nyuwo moosuwela wira koohiya owurya. Nyuwo moosuwela wira kinniweettela oratta-ene amwaar’aka. Nyuwo moosuwela wira miyo kinniira *ela*. Miyo kinniira *ele*.” Nyuwo khamurina hat’etthu yo ovahererya.

³⁷¹ “Okhala wira ikano sa sooruma sa erutthu khisaawerya wira hat’etthu, masi oruuha nrromelo mukina ti wiirale. Nrromelo yoowo okhanle Kristu, hiyo nihaana nankura a munepa, oolipa ni ekeekhai.” Nwehe.

Nto khaakhala ohipacenrye olapha . . .

Pronoome, nyuwo mwaweha va, eri ni ileetera soothetemana.

. . . aakhala namukuttho:

Kahi namukuttho paahi, masi Owo aakhalihwiwa Namukuttho mwaha wo olapha. Kahi . . .

³⁷² Vano nwehe. Nrowe nisome onamukuttho mukina.

(Tthiri anamukuttho ale, aLevi, athu a ehaakhi, a naxariya, a nneema, anamukuttho ale yaakhalihwiwa ehilamphe; . . .)

373 Muluku ohimnye paahi wira, “Wa enamuna ya—wa enamuna y’Aroni, Owo aakhalihaawe anamukuttho ala.” Awo jaarwa ettharaka maloko. Awo jaarowa oxikola ni wiixutta okhala alaleyi ni sikina. Awo jaarwa siiso. Vano Muluku aakhaliha anamukuttho siiso. Awo yaanikhaliha anamukuttho, mwaha wo osoma waya, mwaha wo oranttelana waya wo orithi, ni siiso. “Masi Mutth’ula aakhalihiwe Namukuttho mwaha wo olapha Muluku iiralyaawe.” Nwiriyaane oratta-ene vano.

(. . .yaanikhalihiwa ehilamphe; masi ola voolapheliwa ni ole omuhimenrye wira, Apwiya aalapha ni khanrukunuxa murima, amen, Nyuwo mwa namukuttho a mahiku othene ntoko sihimyyaawe Melikhiseteki:)

Tivo Yesu okhalihwaawe mwaataano muulupale wooromeleya.

Vano, naakuvaka.

Ni awo vekeekhai yaari anamukuttho anci-ene, okhala wira mwaha wo okhwa awo khiyaatthikela:

Anamukuttho, ikonto imaara ikonto imaara ikonto sene, okhala wira awo khiyaarina etthu woohikhala okhwa ni okhwa ni iretta, ni okhwa ni okhwa ni okhwa.

374 Masi nkanweheni Owo.

Masi mutth’ula, (Mutthu xeeni?) Yesu, okhala wira owo voohihyererya onnikhala mahiku othene, owo orina onamukuttho ohinrukunuwa. Vaavo a . . .

Tivo owo vanweryaawe owoopola voomalela; hata orakamme sayi, vathi xeeni, orakamme sayi, Owo onniwerya owoopola voomalela; ale animwaattamela Muluku mwa yoowo, . . .

Kahi ni . . . exariya anyu; masi ni olapa wanyu. Munnona?

. . .ale anrwa wa Muluku mwa yoowo, okhala wira onnikhala mahiku othene wira olapeleke mwaha wa yaawo.

Owo ori vaavo, voohihyererya, alapelaka.

Siiso aatthuneya namukuttho muulupale wa hiyo, yoowo ori ooreera murima, oohittheka, ohirina yoonanara, oovalaanyiwa ni anatampi, ni ookhalihwa Namukuttho Muulupale Wirimu;

375 Eyo eri vo. Vano, miyo keererya othoonyerya mwaha aka, onookipweteya. Miyo keererya othoonyerya, wira, “Ahe, atithi aka yaari mutthu ooreera murima. Atithi aka yaari mulaleyi. Ahe, miyo kinnikhalaka mukereja.” Nlelo wookipweteya. Masi Mutthu ula ti Ole ooloka voomalela, Kristu. Owo omphwanyaneya vale ni onvaha Ephome Awe voohihyererya mwaha wa itampi saka. Eyo vo.

Owo khomphavela nihiku ti nihiku, ntoko anamukuttho...ale, ovaha mukuttho, voopacerya mwaha wa itampi sawe, nuumala mwaha wa itampi s'atthu: okhala wira owo ohiira ekwaha emosa, okathi aivaherenryaawe mmansawe.

376 Vano nkawehani eversiikulu yookiseya.

Okhala wira ikano sinnaakhaliha anamukuttho aalupale athu ootteetheya; . . .

377 Ti yeeyo ikano, ikano sa erutthu, siniiraaya. Vano, kaanithuna kikhalana iwoora soophiyaka piili va. Ti siiso ikano nlelo sinaakhalihaaya athu alaleyi. Ti yeeyo.

378 Vano, eniiriwa, “Ahe, mulopwan’ola ookhalana musuwelelo w’oseminaariyu.” Miyo nkaarowa waakakhanya musuwelelo aka mwaamukhaani wa Wirimu mwaha wa iseminaariyu sothene molumwenkuni.

379 “Vano, hiyo noomusomiha mulopwan’ola. Owo—owo oothanliwa ni ekatha. Owo mutthu oikhalinhe mmansawe.” Miyo khenkisivela enamuna yeeyo. Onkisivela mutthu ookhalihwiwa ni Muluku. Munnona? Munnona?

380 Masi ikano nlelo sinnaakhaliha anamukuttho. Ikano nlelo sinnaakhaliha alaleyi. E—ekereja Patista, awo annaakawanya alaleyi; vakhani a yaawo, aakhalana maakina anaapaka. Ametotista aakhalana. aPatista aakhalana. Maprespiteriyaano, aNasareno, Anawetta a Osantu, aPentekosite, awo annaapaka vowaakuvaxa ntoko sinweryaaya, ntoko mweettiheryo muulupale, maakina maalupale. Aneemela vale ntoko e . . .

381 Miyo kweekwe kaanitimya, “Miyo—miyo vekeekhai kinnimoonela othunku mwalyakhu owuurameliwa mmaakinani.” Moosuwela, mwalyakhu mwaamukhaani uurameliwe mmaakinani, khuurameliwe oratta-ene. Nnari. Ntthehi ohaana omuuramela naaviye. Masi naaviye owuurameliwa mmaakinani, owo akhuma vale owo oniira, “piyu, piyu, piyu,” ni khorina maama wira orowe-wo. Munnona? Owo khonsuwela ele ekhanle maama. Ti yeeyo. Owo onimwiipa omwiihanaka, masi khorina hata mmosa.

382 Masi naaviye ole uurameliwe vathi va ntthehi, enamuna y’ephattu, owo onniipa ni maama onnaakhula. Ti yeeyo.

383 Nto imaara sikina kinnuupuwela mwaha wa musuwelelo ola nno w’oseminaariyu onkhuma maakina ala oowuuramela maalupale oLouisville ni mulaponi mothene, ewuuramelaka alaleyi ikonto sene. Maakina oowuuramela a Pentekosite, ni maakina oowuuramela a Prespitariyaano, ni—ni maakina oowuuramela a aPatista, othene aya aniwuuramela awaya—awaya—anaaviye aya axikhaani. Awo, “piyu, piyu, piyu,” ni olavula sa maakina oowuuramela awo atotholiwaaya-mo.

384 Masi okisivela okhalana Tithi, Maama. Nittotopeliwe Nsina n'Apwiya! Khiyaari anci-ene ayariwe ni miyo, masi ale yaari iwe axinn'aka. Amen. Nookhalana Maama onaakhula okathi nyuwo... Maama Ori Wirimu, Yoowo okhanle maama a hiyo othene. "Ntoko mwalyakhu sinaaphuramwelaawe axaan'awe, ni oweepesa, ni—ni waalema... waaphuramwela axaan'awe, siiso miyo kinimoophuramwelani. O Yerusalemu, Yerusalemu, imaara sinci-ene Miyo kaaphavelaaka wookuxani ntoko mwalyakhu onaaphuramwel'awe axaan'awe! Imaara sinci-ene Miyo kaaphavelaaka wookhalihani Awaka, masi nyuwo khuhitthuna. Nyuwo mwaarina iseminaariyu sanyu, mwaawuramela anamukuttho anyu. Awo yaawixuttihani okivirikanya Miyo. Vano moohiwa meekhiinyu. Opwetexiwa wanyu ori ohoolo wanyu."

385 Vano miyo kinihimya ela: Oh, atthu, oh, atthu, imaara kavi Erooho Yoowaarya ephavenlyaaya woophuramwelani, ntoko mwalyakhu onaaphuramwelaawe axaan'awe, masi nyuwo munthuna inamuna sanyu yeenyu, munoorowa okhalana iphiro sanyu yeenyu!

386 Ohiyu umosa kaatthuna kilaleerye, "Ephiro anyu yeenyu." Moosuwela, Kayini aatthunne ephiro awe yoowo. Mutthu onthuna ephiro awe mwaneene, olelo. "Masi yookhala ephiro enikhala wira ti yooreera, masi emalelo aya okhwa."

387 Vano nwehe. "Mwa yeeyo Owo onihimya wira, 'Naanaano—mwaataano wa naanaano...'" Kookupali, vano wira... Nnari. Kaari nipuro noovonyeya.

388 Versiikulu 28.

Okhala wira ikano sinnaakhaliha anamukuttho aalupale atthu oottettheya; masi nuulumo noolaphela, nirwiye ohoolo wa ikano, ninnimukhaliha Mwaana, oophwanelela voohimala.

389 Muluku attotopeliwe mahiku othene, mwaha wa Mwaana onkhala mahiku othene ntoko sihimmyaawe Melikhiseteki. Ni Owo khonakhalaneke epacerelo. Owo khonakhalaneke emalelo. Nto ikano khisaawerya okumiherya hat'etthu siiso, okhala wira saari sa erutthu. Ekereja khenwerya okumiherya hat'etthu siiso, miromolelo, okhala wira iyo ti sa erutthu. I—iseminaariyu khasinkhalakhala siweryaka okumiherya etthu siiso. Awo aheererya osomiha olumwenku Yeeyo. Awo aaphavela otthokiha wa Yeeyo. Awo aheererya khula enamuna mulaponi, opaka khula etthu awo yaawery'aya, nave ohiya etthu yuulupalexa: "Muhaana oyariwa Mwemmo." Muluku onnookhalihani ele mukhanly'anyu, vekeekhai, kahi mwaha wo ohiya wira *ela*.

390 Vano, aNasareno, nyuwo khamurina owaraka epeethe, khamurina owaraka eroroco, ni muhaana okhalana itthu *khata*, miyoono sanyu sihaana orakama *so*, miyoono sa kamisa, isaaya sanyu sihaana orakama *saale*, ni a—alopwana ehiireke mpantte

wa elooa. Nto awo kharowa woopatisani nyuwo mwaahikhale. Vaareera. Va anoorwa aKatolika, ni awo aakhalanasa sawaya. Nto va anoorwa aMetotista, awo aakhalana sawaya. Khula mmosa a awo ookhalana ekopo y'ophima-no. Mwaahilikanele, vaareera, ti yeeyo tu. Munnona?

391 Vano nto, masi etthu y'ekeekhai ti, t'ila, "Nkiniruuha etthu mmiyoononi mwaka! Kinvarelela vamwiikimanyoni Vanyu paahi. O Muluku, oohiwar'etthu, owiiniwa murima kinthuna mukhaliheryo. Oh, kinoorwa vowiiyeviha saana, Kristu, kihimyaka wira nkhiyo etthu ni khiivo hat'etthu mwa miyo. Mukaakhele, O Muluku." Vano Muluku onoowaakhelani.

392 Vano, nyuwo pooti hata muhimusuwelaka ABC anyu. Nyuwo pooti muhisuwelaka ovirikana wa ekafe ni epwiri. Pooti musuwelaka, muhisuwelaka ovirikana wa haya ni hey, ntata noolopwana ni noothiyana. Khenvirikana hata vakhani ele *ehinsuwela*anyu. Yookhala etthu emosa *murin'anyu* osuwela, wira, Yesu Kristu ookhala voopuroni vanyu ntoko natampi. Ni nyuwo mukuxe opuro anyu, wira mukhale muxariyani Mwawe, mulapaka khula nihiku wira moovonya, ni mumphenteke Yoowo ni murim'anyu wothene, ni mawoko anyu othene ekhale ooheleliwa wa Yoowo, munoophiya Wirimu. Ti yeeyo tu entthuneya, okhala wira Ekumi yaari mwa Kristu ehaana okhala mwa nyuwo, ahiiso moopweteya.

393 Nihinatthi omaliha, munnuupuwela mwaataano Muluku aapanke-awe ni Abrahamu voohiphaveleya etthu? Etthu airalyaawe makaaripi ale okathi Muluku iiraly'awe, "Mukihiye koone..." Okathi Abrahamu iiraly'awe, "Mukihiye koone moota Nyuwo munrow'anyu wira." Kapiitulu 16, kinoona wira ti, ya Maphattuwelo. "Mukihiye koone moota Nyuwo munrow'anyu wira."

394 Khwira, "Murwe va, Abrahamu." Vano Owo khimukuxa Abrahamu, khwira, "Murowe mwakiruuhele e—epwittipwitthi, murowe mwakiruuhele e—e—epuri, ni murowe mwakiruuhele mwaanyompe oothiyana. Ni kinthuna wira mwaaruhe wa muhele mukuttho."

395 Nto Abrahamu aahirowa khukuxa epwittipwitthi, ni e—epuri, ni mwa—mwa—mwaapwittipwitthi, ahiiso, mwaanyompe oothiyana. Nto owo aahiwiivasa. Sothene saari mikuttho sooreea. Khukawanya eriyari ipantte piili, khuhela vale. Vano owo khurowa khukuxa masiya maili, khuhela vale. Vano Abrahamu aanaaweha axipalame awo, anwehereryaka Muluku orwa. "Vano, Pwiya, wookhala mukuttho, Nyuwo munrowa wira sayi yeela? Nkisuwenle moota Nyuwo onrowaanyu omoopola mutthu voohitthuna wawe. Nkisuwenle moota Nyuwo onrow'anyu wira ela. Munrowa wira sayi, Pwiya?"

396 Apwiya khwira, “Vano nwehe, Abrahamu. Nyuwo mwa profeta. Nyuwo mwa a erooho, nto munoosuwela saana ethhu enihimy’aka.”

397 “Vaareera, Pwiya, kintthuna koone.” Vano miyo kinootepiha paahi.

398 “Tivo, Abrahamu, nyuwo nwele va vano, mukilaathi va mwaaweheke axipalame ale.” Tivo owo aahiwoomola axipalame othene, mpakha nsuwa opacerya otupweela.

399 Nto naanaanoru, Muluku khukhuruwa. Vakhurunw’awe, Abrahamu khupacerya onvola ikhove. Muluku khwira, “Abrahamu, Miyo kinrowa wookhalihani oorupa.”

400 Vano nwiriyane, mpatthani ootthariha ikano. Moone, Muluku aahimukumihia Abrahamu voomalela va mwah’owo, owo khaarina-vo hat’ethhu mwa yeeyo. Nto ti siiso Owo owiirinhaaweni. Nyuwo muniira, “Oh, miyo koomphavela Muluku.” Khimumphavenle.

401 Muluku t’ophavenleni, “Khaavo onwerya orwa wa Miyo vahikhanle wira Atihi Aka anoomuruuha toko.” Munnona?

402 Ti Muluku onoophavelani, kahi nyuwo mumphavelaka Muluku. Nyuwo khimunatoko wira. Mukhalelo anyu ti woonanara. Nyuwo mwa ekuluwe. Khamunsuwela evirikanelo. Nyuwo munkhala munikhomani mwa kuluwe paahi. Eyo ti yothehe ensuwelaanyu. Ennoosivelani. Onwurya saravexa, weettasa munikhomani, weettana mwaara a namwaattamanani anyu, ni wira itthu sothene sootakhala munweryaanyu wira, enkhala ntoko yooreera. “Oh, munna, ninvirihia okathi wooreera!” Nyuwo munuupuwela wira ti wooreera.

403 Masi Muluku ommama vamurimani vanyu. [Munna Branham ommama vapulpitu—Mol.] Ti yeeyo enrakunxa. Khamuhiyo nyuwo mmanaka wa Muluku; Muluku t’ommama wa nyuwo. Atamu khonatoko omana vamurimani wa Muluku; Muluku t’amanne vamurima va Atamu. Nto nyuwo mwa mwaana a Atamu. Ti yeeyo. Atamu ohinatthi owerya okhala mwaana a Muluku, emaara ekina, Muluku aahaana omana vamurimani vawe. Nyuwo muhinatthi okhala mwaana a Muluku, Muluku ohaana omana vamurimani vanyu.

404 Vano, Abrahamu aahirupa. Nto varumpe-awe, ethhu xeeni yaari yoopacerya owo oonalyaawe? Epiphi, yoowoopiha, yootutuxa, yooxankiha saana. Iwo okhwa, onrweela nloko nothene n’atthu. Vano owo aahiweha ottaiwene vakhani, nto aahimoona ttukuttha atthuwaka mwiixi. Muhinatthi okhalana mwiixi, muhaana okhalana mooro. Mwaha wa yeeyo kinaamini aka omooroni ntoko nipuro ninvarela. Vaareera.

405 Owo aahooniherya, wira khula mmosa a hiyo oolamuleliwa okhwa, ni khula mmosa a hiyo aahaana orowa omooroni, okhala wira hiyo n’anatampi.

406 Vano, masi, ovikana vaavo, owo aahoona Waarya waamukhaani, wootteela.

407 Nto Waarya nno waamukhaani, wootteela, Waarya exeeni? Exeeni waari Waarya iwe wootteela? Nripu nle na Mooro naarowa ohoolo w'ana a Isarayeli. Nripu na Mooro naakumanne ni Paulo arowaka oTamasiku. Nripu na Mooro naamukuminhe Petru mukhatteya. Nripu na Mooro niri vaava ohiy'ula.

408 Muluku ule Ohinimala, Muluku oohimala, Owo Mwaneene aaheetta eriyari ya mikuttho iya sookawanyiwa, (oh, wulu), nno ni iwe wa khula mmosa. "Ti siisa onrowaaka wira, Abrahamu. Mukiwehe Miyo, etthu enrowaaka wira. Miyo kimpaka mwaataano va. Ni kinoolapha, wira, vootthariha Osuulu, Miyo kinoomukhaliha Mulipa-oolapelela. Kinoopaka mwaataano ni okhwa. Ni kinoohukumu okhwa, mw'erutthuni, okhala wira Miyo kinimoorwa okuxa Mmansaka. Abrahamu," khwira, "mwa Osuulu anyu, Abrahamu, onimoorwa, nyuwo munookhala tiithi a mulaponi, mwa Osuulu anyu. Nto kahi nyuwo paahi, miyo kinimmanaaka natiri ula ni nyuwo, masi Osuulu anyu numala nyuwo." Owo aahimusuwela khula mmosa aarowa okhala. "Kahi *awo*; masi ele Miyo eniiraaka. Miyo kinoorowa wira, Abrahamu. Kaahimuroromela Atamu, vano owo khunhonona awawe. Ni khula mmosa onnimuhonona awawe. Masi Miyo kinoopaka ola ni Yoomi, ni kinimwiilaphela Mmansaka, 'Miyo kinoommaliherya.'" Amen. Amen. Amen.

409 Hiyo niniira exeeni, nimpaka mwaataano? Miyo kiniira, "Munna Neville..." Vano nwehe ela, minuutu mmosa paahi. Miyo kiniira, "Munna Neville, kinimooleelani enrow'aka wira. Nyuwo mwalaleerya mpakha...meelo ohiyu, ni ohiyu ontharelana, mpakha Namararu, Miyo kinoolaleerya, okhuma Namararu, mpakha Ettiminku." [Nipuro vahiitthu mufiitani—Mol.] "Nyuwo munnikupali?"

410 "Ayo, mulopwana."

411 Ti siiso nniiraahu. "Mukivahe ntata, mmiravo." Ti yeeyo. Owo mwaataano wAmerika. Ti siiso hiyo nimpakaahu mwaataano.

412 Vano, awo ampaka sayi mwaataano oJapawu? Hiyo nimpaka, niiraka, "Nyuwo mwiire *elexe n'ilexe*, ni miyo kinimwiira *elexe n'ilexe*." Ninkuxa ekatha ekhaani ya maakha, okhala wira maakha esivelo. Nto hiyo ninkuxa maakha, vano miyo kinimurihelela Munna Neville, ni Munna Neville onikuxa maakha—maakha khukirihelela miyo. Owo mwaataano onthuka.

413 David Livingstone aapanke sayi mwaataano ni nooriipe a wAfrika, wira akele mmuttettheni mwawe? Owo aaroorowa khumphwanya mukhulupale, wira owerye ovira mpakha weiwe, wira alaleerye Ehapari yooreera ni ovara muteko. Vano awo khukuxa ekahi ya eviinyu. Va ori waataana ni nooriipe

wAfrika. Awo yaarinasa ekahi ya eviinyu. Nto mukhulupale nooriipe khuthikila mitika sawe, khuyeeherya ephome mukahini mu mwa eviinyu. Ni David Livingstone khuthikila mitika sawe, khuyeeherya ephome mukahini mwa eviinyu. Awo khuhakhinya. Livingstone khiwurya nuusu, ni mukhulupale nooriipe khuwurya nuusu. Vano khuvahana yoovaha, mukina ni mukhwaawe. Mukhulupale nooriipe, David Livingstone khwira, “Muntthuna-ni wa miyo?”

414 Owo khwira, “Ekhasako eyo yootteela nwanryaanyu.” Vano Livingstone khurula ekhasako awe khunvaha mukhulupale nooriipe. Owo khwira, “Nyuwu muntthuna-ni?”

415 Owo khwira, “Nivaka nlo nooreerihiwa nurinaanyu mmatatani mwanyu.” Okhala wira, owo aahisuwela wira aamuwerya okela ni nenlo, tivo owo khukuxa nivaka nle. Vano awo yaahikhala axinna, okhala wira awo yaahipaka mwaataano.

416 Nto okathi owo aakelaawe, mahimo yaanikhuma wira emwiive, owo aavenxaka nivaka nenlo nooreerihiwa. Nto vaairaawe siiso, awo yaaniweha khwira, “Oh, oh, khanikhanle omukwanyaka mulopwan’ole.” Mwaha wa xeeni? “Owo munna mmwaataanoni, onaamwi oryeene mukunya, hiyo khinnatoko omoona khalayi.” Awo yiira ehinatoko osuwela wira yaari anooriipe mpakha vaamonne aya owo. Awo khiyaatonko omoona owo khalayi. “Masi owo munna a mmwaataanoni. Owo orina nivaka na mukhulupale mmatatani mwawe.”

417 Elatarato xeeni yooreera, olelo, ya owurya mwaataano w’Ephome ya Pwiya Yesu, ni owerya wa Erooho Yoowaarya mwa hiyo! Ninkelela ohoolo mwa Nsina na Yesu, ni ithoonyeryo iya sinimwaatthara ale aniira mpantte. Nlo Nivaka nooreerihiwa na Mukhulupale. Munnoona moota oryaaya, mwaataano?

418 Awo yiiraka sayi onkela nsuwa okathi wa khalayi? Awo yaamulapha, mukina ni mukhwaawe. Awo yaaiva enama, khukawanya nuusu, nto yeemela eriyari. A—axilopwana aili yeemela eriyari ya yeeyo, enama yookawanyiwa ipantte piili. Vano yaamulapha. “Kavonya vale omaliherya *ela*, kavonya vale wira *ela*, vano, *ela* ni *elexe*, erutthu aka ekhale ntoko enama *ela* yookhwa. Erutthu aka ekhale ntoko enama *ela* yookhwa.” Nto awo yaira yeeyo, yaakuxa mwaatano ola khweemela eriyari ya *yoola*; khulapha, khulapha wira aniwmiira. Ni khukhera epaphelo, vamosa, eriyari, khunnyana mukina, ni mukwaawe. Nto mwa okathi uwo awo yaamukumana. Nto awo yaamukhwa vathi va ehukumu yeela, yavonyaru omaliherya olapha iwo; ni okhala ntoko inama iye sookhwa. Vaareera.

419 Munnoona inama tthaaru? Yoolikana; mwaapwittipwitthi, epuri, mikuttho miraru soolikana. Mwaapwittipwitthi aari exeeni. . . Nsiya naari exeeni? Ni masiya maili yaahimya exeeni? Masiya maili yaavaheriwa mukuttho wa woopowa

ni ovonihwiwa, mu—mu...yaakhalinhe epannte. Munnona? Ettipiheryo yaapakiwe vooirikana, masi ovonihwiwa waari omosamosaru, ni siiso woopowa waari omosamosaru. Masiya maili, oohikawanyiwa, yaahimya wira yaathonyerya, soopiili. Woopowa...“Makhwatta Awe t’anivoninhe. Owo ohaaxeriwe sootheka sahu. Makhwatta Awe t’anivoninhe.” Awo yaapwehiwe epannte aya, oohivalaanyiwa. Masi mwaataano, epannte ya enama (soothaaru) saahithikiliwa. Munnona? Vano vaairaaya siiso, awo yaamuthikila khupaka mwaataano aya.

⁴²⁰ Nkawehani etthu Muluku aamuleelaawe Abrahamu: “Okalvario, oKalvario, ntoko Osuulu anyu. Mwa nyuwo onookhuma Isakhi, mwa Isakhi onookhuma *Lexe ni lexe*, Yakope, mwa Yakope onookhuma Yosefe, mwa Yosefe, erwaaka, erwaaka, erwaaka, arantteli, mpakha vookiserya, mwa Osuulu ule w’exariya!” Awawe... .

⁴²¹ Owo onoomalaru ohimya, va, wira Pwiy’ahu okhumme nloko nimosana nahaasuwele. Moise khonahimyeke eyo, okhumme mwa onamukuttho. “Pwiy’ahu okhumme nihimo na Yuta.” Kahi na Levi, maana awo yaari atthu a erutthu ootthariha ikano. Masi Pwiy’ahu okhumme wa Yuta. Ovuwa! Eyo eri vo. Otthu natiri olapiwaawe!

⁴²² Nwiriyanee saana vano, nimalihaka. Nto oKalvario, Muluku aahikhuruwa khukuxa erutthu ya Mwan’Awe Yoowo, mwa yeeyo owo aakhanlyaawe-mo, ni Owo aahikhera oKalvario. Ovuuva wawe ephome, oohaaxiwa, oothikilasiwa, ni nivaka naahikela mmwe khimukhera Owo, ni Ephome Awe yaahivuuva. Nto Owo khwira, “Tithi, mmatatani mw’Anyu miyo kinnivahererya Erooho Aka.” Owo khuuramiha muru Awe. Vano elapo yaahithukumela, overunya waahikukutteya, ni itari saahiruma. Muluku aalepa mwaataano Awe ohinimala.

⁴²³ Vano Owo aahikuxa erutthu Awe yookhwa mmahiye, nihiku noopacerya na esumana, khuruuha Wirimu, khukilaathi weiwe ntoko Namukuttho Muulupale, ntoko eyuupuxeryelo; okilante-ene weiwe, voolikana, mahiku othene. Vano Owo ooveleeliha Erooho yeeyo Owo okumihaly’awe mw’erutthuni yeel, khutthikelihama Mukereja. Nto Ekereja eyo ehaana okhalana Erooho emosaru yaari mw’erutthuni mwemmo, ahiiso eyo khenrowa olikana ni Yeeyo woohihimuwani. Ipantte iyo soopiili sihaana olikana saana. Nto Ekereja ela yaahikhale yoolikana, oratta-ene Erooho emosaru yaari mwa Kristu, khamunrowa Wookuxiwani.

⁴²⁴ Vo t’uri mwaataano ohinimala, munna. Mphavele, mmansinyu, ele eri mmurimani mwanyu. Mwaaphenteke Apwiya. Mukhale oolipa saana wira muhoopowa. Muhiileve mwa yeeyo. Munimwiileva. Oh, nyuwo, hiyo n’atthu a wAmerika, onisivela wiileva, masi muhiileve mwa Yeeyo. Mukupali wira muri oolikana. Kahi mwaha wo wira muhiitakanxa mukereja,

masi okhala wira nyuwo vekeekhai mooyariwa vasya, Kristu ohoorwa wa nyuwo, mwa oMutthu wa Erooho Yoowaarya.

425 Vano, yoomaleliha paahi, nave, kinoomaliha. Ohakalala xeeni vaatthuneya hiyo okhala, wona Erooho emosaru yaari mwa Yesu Kristu, eriyari ahu, yiiraka itthu imosaru Owo iiraly'awe okathi waary'awe elapo ya vathi! Moota vaatthuneyaaya hiyo otteeliwaka murima!

Nrowe nivekele vano, okathi onuuramihaahu muru ahu.

426 Pwiya, ninnikhala nihiku nuulupale. Kinaamwi, koonaka wira kweekwe kinniiraka, kinnivonya. Nkinwerya othoonyerya Eyo oratteene, Pwiya. Kinvekela wira Nyuwo mukilevelele mwaha wa inamuna saka soophepuwa. Oh, kinnilapa itampi saka ohoolo Wanyu, ni ovekela omoreliwa ikharari, kisuwelaka wira ookhala Namukuttho Muulupale eemenle iwe moonoo woolopwana wa Muluku, Wirimu, Yoowo ohikhalihawe mwa enamuna ya Aroni, voothariha ikano ni malamulo ni itthu. Masi Owo oheliwe Iwe mwaha wa mahala a Muluku yaawehale ohoolo, ohinatthi opattuxiwa olumwenku, khukoona miyo vathi va molumwenkuni, nto khukhwela itampi saka, wira okihokoloxerye Momweneni mwa Muluku. Miyo kinnooxukhuruni, Tithi, mwaha wa yeela.

427 Okhala wira, Erooho ela vano enruma mwa athu Anyu ti Yoohimala ntoko Muluku sikhanylaawe Oohimala. "Miyo kinnaavaha Ekumi Ehinimala, Ekumi ya mahiku othene, Ekumi ehinimala, ni awo kharowa opweteya." Nto Woolamuliwani, awo kharowa nnakhala okhala iwe. Awo aavira moolamuliwani. Awo aakela Movuwani. "Nto emp'ela ya vathi va yakurumuwa vale, nookhalana ekina ennilipelela iwe wira nikele-mo." Kooxukhuru mwaha wa yeeyo, Pwiya.

428 Miyo kinvekela vano, aakhanle-ene mmosa va, ohiy'ula, ohinatoko nlelo owurya Ephome y'ekeekhai ya mwaataano, ohinsuwela etthu Eyo enihimyaaya, ohinsuwela etthu enihimya oyariwa vasya, okhalana opatthana w'ekeekhai ni Kristu mmurimani mwaya, wala mmurimani mwawe, emwaakhele Owo naanaano va, nilipelelaka ni ovaha okathi ula. Nto Nihiku nenlo, hiyo ninvekela wira niire noonihenrye Ehapari yooreera moWaaryani moolikana. Hiyo ninnivekela, mwa Nsina na Kristu.

429 Nirineene muru ahu wowuurama, aamukhala mutthu oninvenxerya matata Kristu, ni wira, "Kristu a Muluku, mukimorele ikharari. Mukihiye, ntoko murumeyi Anyu oohiphwanela, vano kaakhele Erooho Yoowaarya mmurimani mwaka. Ni mukivahe nrromelo ni ophenta tthiri kimp'havel'aka"? Nyuwo mwaira muhaakhenle Yeeyo, munonvenxerya matata Yoowo, mwiiraka, "Pwiya, ela ethoonyeryo wira kinnitthuna Yeeyo"? Munooovenxa ntata? Muluku ooreeriheni ottuli iwo, muhano. Muluku ooreeriheni

va, mulopwana. Ooreeriheni va, mulopwana. Muluku akhale ni nyuwo. Ti yooreera. Mulopwan'ola wookiseryani nno, Muluku ooreeriheni, munn'aka. Ni mutthu mukina tho, nihinatthi omaliha, nilipelelaka paahi okathi vakhani. Muluku ooreeriheni ottuli iwo, mwan'aka. Mutthu mukina tho?

⁴³⁰ “Miyo vano kinnitthuna. Kinnitthuna, Pwiya Muluku. Nyuwo munnisuwela murim'aka. Nyuwo munnisuwela etthu eri mmuupuweloni mwaka. Nyuwo, 'Erooho ya Muluku ekumixa ni yoowiithaxa onvikana xoowa oniitha ninno ni nno, hata envolowa mpakha okawanya makhuva mpakha mpuwa mwa makhuva, nave Ennilamula miyuupuwelo sa mmurimani.” Mupuwele Yeeyo. Owo onnisuwela miyuupuwelo sanyu, itthunelo sanyu.

⁴³¹ Munnitthuna ovenxa ntata? Mwiire, “Mukimorele ikharari, Muluku, naanaano va. Miyo—miyo kintthuna wira Nyuwo musuwele wira koosuwela wira koovonya, ni kinnisuwela, masi kintthuna kikhale oratta-ene.” Vaareera, nirineene nlelo muru ahu woowurama, nivekelaka vano, muupuwele okathi vakhani paahi. Khanintthuna waakuva ni yeeyo.

Mwala w'Okathi, kitthukuleliwaaka,
 Mukiipithihe mwa Nyuwo;
 Muhiye maasi ni Ephome,
 Akhumme mpararini Mwanyu . . .
 Ekhalé wa etampi vaili . . . (Ovona vaili, Owo
 oolaphela, itthu piili soohirukunxeya.)
 Ekoopole mooviruwani ni ekilokihe.
 Kikuxaka . . .

⁴³² O Pwiya, munivahe naanaano va wira nisuwele wira imumulelo iya ninkhalanaahu ti sootthyawa. Khanisuwenle siri kavi tho sinihalenle. Yothene eyo ti ni muupuwelo anyu muulupale. Eniheliwa mukaano ni Nyuwo. Oh, munimorele ikharari. N'ale avenxale matat'aya, Pwiya, khivantthuneya waaromola. Nyuwo munnaasuwela khula mmosa a yaawo. Masi miyo kinvahererya nivekelo nla nooxontela mwaha wa yaawo. Kinvekela wira Nyuwo mukumihe olamuliwa mmurimani mwaya, ni mwaahiye erwe voominyala, naanaano va, Veehiceni; yeete voominyala elukamaka Veehiceni va Muluku, yinlele oreeriwa waya avahiwaaya ni Muluku. Nyuwo muhaavenxiha matata. Awo khiyaakhanle wiiraka eyo mmansaya. Ni miyo kinvekela, Muluku, wira Nyuwo munivahe yeela mwa Nsina na Yesu. Amen.

. . . mmansaka mwa Nyuwo;
 Vano, mmukokhorele Yoowo paahi vano.
 Muhiye maasi ni . . . (Oh, wulu!)
 Akhumme mpararini mwanyu woovulalihiwa
 yaayeeheiyé

Ekhale wa etampi ovoniha vaili,
Ekoopole mooviruwani ni ekilokihe.

433 Akavi anoona oreera saana vano? Nvenxe ntata nanyu, mwiire, “Attotopeliwe Apwiya!” [Muthukumano oniira, “Attotopeliwe Apwiya!”—Mol.] Oh, Awo t’othamaleya! Oh!

Nookhala Nipuro vEphattuveloni. Munnisuwela, Munna Gertie? Nrowe. Akavi enaasivela esipo eyo? Vano ninrowa okhalana muteko w’opatiiso, m’okathi vakhani. (Nyuwo munoorowa waapatisa?) Vaareera.

. . .nipuro, ayo, nookhala nipuro,
Nookhala nipuro vEphattuveloni wa nyuwo;
Nipuro, nipuro . . .

434 Vaareera. Anamwiivahererya ale a opatiiso, alopwana eroweke esaala *ela*, athiyana *ela* nno, vaareera, ale anrowa opatisiwa mwa Nsina noottotopeliwa n’Apwiya ahu.

. . .nooreera wa nyuwo,
Nookhala nipuro vEphattuveloni wa nyuwo;
Muluku onnikhalaka ooreera murima wa miyo,
Nookhala nipuro v’Ephattuveloni wa nyuwo.

435 Athu othene vano:

Nipuro, nipuro, ayo, nookhala nipuro,
Nookhala nipuro vEphattuveloni wa nyuwo;
Oh, nipuro, nipuro, ayo, nookhala nipuro,
Nookhala nipuro v’Ephattuveloni wa nyuwo.

436 Oh, okisivela esipo ele ya khalayi. Ankhi nyuwo?

Nookhala nipuro vEphattuveloni wa nyuwo;
Oh, nipuro, nipuro, nookhala nipuro
noowaatta,
Nookhala nipuro vEphattuveloni.

437 Vano, okathi mukhulupale okenlyawe, wira ailikanyiherye opatiiso, miyo kaatthuna kileeliherye muthukumano. Nto kinimwaavekela matiyaakono kamosa-kamosa, yaaweryaka okiiwa musaala, awo yailikanyiha, erwe ni—ni ekileele, nto wira nithaamihe miikorofooni. Ninthuna wira othene nyuwo moone yeela. Enrowa okuxa minuutu soophiyaka muloko, nto ekereja enoolaxeriwa.

438 Vano kintthuna koosomeleni Soolempwa vakhani sooreerhiwa. Kintthuna kosome Seiyo muLiivuruni mwa Miteko. Ni kintthuna kipacerye eversiikulu 12 ya kapiitulu 2 ya Miteko.

439 Vano, kintthuna wira nwehe kapiitulu 16 ya Luka Oowaarya, kiireke ya Mawewu Oowaarya, kookupali wira ti yeeyo, wira Yesu aakhuruwa vamwaako. Awo . . . Khwaahimeerya awiixutti Awe, “Athu aniira wira Miyo Mwaana a mutthu ki pani?”

440 “Nto akina aya khwira, vano, Nyuwo mwa ‘Eliya.’ Nto akina aniira wira Nyuwo mwa—Nyuwo mwa ‘Profeta.’ Nto akina aniira wira Nyuwo mwa *ela wala ekina.*”

441 Owo khwira, “Masi Nyuwo muniira wira Miyo ki pani?”

442 Nto Petru khwira, “Nyuwo mwa Kristu, Mwaana a Muluku mukumi.” Ekeekhahi?

443 Yesu khwira, “Ooreeriwa ti nyuwo, Simoni Par-yona, maana erutthu n’iphome khewuupululenleni ila. Khamunatoko wiixutta oseminaariyu. Nyuwo khamunatoko wiixutta Eyo ni mutthu.” Khwira, “Masi Atithi Aka ari Wirimu t’awuupululenleni ila. Nto Miyo kinihimya wira nyuwo mwa Petru. Vamwala va Miyo kinooteka-vo Ekereja Aka. Mikhora sa mookhwaani khasinxintta Eyo. Ni Miyo kinnoovahani ihulelo sa Omwene wa Wirimu.” Eyo ekeekhahi? “Ni sothene sinrowaanyu otaphula vathi va, Miyo kinootaphula Wirimu. Etthu entthuk’anyu vathi va, Miyo kinootthuka Wirimu.” Owo ohimye Eyo vaxariya? Owo khaarowa ohimya Eyo. Vano, vaviralyaaya okathi, vano, Petru aahikhalana ihulelo sa Momweneni.

444 Vano, nyuwo atthu aKatolika, nyuwo pooti wuupuwela ela, okhala wira muniira, “Ekereja Katolika etekiwe vasulu va Petru.” Vaareera, hiyo ninoosuwela. “Awo yaahikhalana ihulelo. Ekereja Katolika nlelo yookhalana ihulelo.”

445 Nrowe nisuwele etthu *Petru* airalyaawe mwaha wa ihulelo, noone, vano ninoosuwela. Bibilia aahimwiirela, Petru ni arummwa akina, “Murowe mulaponi mothene. Ale anrowaanyu waalevelela itampi, awo anooleveleliwa. Ale anrowaanyu ohaalevelela itampi, awo khanleveleliwa.” Wira, khino kihimyaka eyo wira... Mutthu pooti ohisuwela saana enihimya’aka. Yesu aahimenrye arummwa, “Ale anrowaanyu waalevelela itampi, ni Miyo kinimwaalevelela. Nto ale ohinrowaanyu waalevelela, ni ohaalevelela, Ni Miyo nkinaalevelela.” Ti yeeyo Yesu ohimya’awe.

446 Nkawehani ekereja Katolika wiipurulela yeeyo.

447 Masi nrowe nisuwele moota awo yiiranse-aya. Nto hiyo nasuwela moota awo yiiranse-aya, vano naahaana wira siiso. Vano nrowe nisuwele.

448 Nlo Nihiku na Pentekosite. Ekereja enoolipuliwa. Awo othene yaarisa empa y’osulu. Atthu yaakhumme mmwe, elavulaka mattaava oovirikana. Mwaha wa xeeni? Khula nntaava vathi v’Erimu naahooniheriwa vale. Enkelesi yaari vaavale, nave. Khula nntaava vathi v’Erimu naahaana okhala vale, nntaava naalavuliwa nihiku nle. Onikelela ohoolo va ni ovaha mattaava manci-ene, ni moota aKereta ni amalapo, ni ayuuta oohikhala eeyareliwo a oRooma, ni—ni—ni a wArapiya, ni othene yaanilavula ni omunn... Vano, awo khayaalavula ilavulelo soohisuweliwa. Awo yaalavula mattaava oohisuweliwa, n’atthu.

Kahi ilavulelo soohisuweliwa, masi mattaava khula mmosa aaiwaawe. Natampi, oohaamini, aaniwerya wiiwa etthu owo aahimy'awe. "Niniiwa sayi mwa nttaava nahu ni—niyariw'ahu?"

⁴⁴⁹ Vano nwehe. Vano yookoha ennikhumelela. Vano, "Akina yaaniveeha." Eversiiikulu 12, vaareera.

Nto othene aya yaahitikinihiwa, ni . . . ahisuwelaka yo wuupuwela, yaanikohana, Enihimya-ni yeela?

Akina yaaniveeha ni wira, Ala . . . asareiyе eviinyu esya.

⁴⁵⁰ Awo yaamwaanyemulasa. Okhala wira, awo yaira sayi? Awo yaanveleyasa ntoko atthu oohapaliwa, ntoko atthu oohapaliwa. Elavulaka, ahisuwelaka etthu awo anihimy'aya, masi yaalaleerya muthukumano ni mattaava awo yahaasuwelaaya, masi muthukumano waanisuwela. Munnona? Vaareera.

Akina . . . yaira, Awo asareiyе eviinyu esya, nkawehani moota aniir'aya.

Akina yaaniveeha, yiiraka, Ala . . . asareiyе . . .

"Masi Petru . . ." Pasoopa, mmiravo! Nyuwo mookhalana ihulelo.

Masi Petru, aaheemela vamosa n'ale muloko ni mmosa, aahirunya, khwaahimeerya wira, . . .

Vano, muupuwele, nno olipuliwa woopacerya wa Ekereja.

. . . Nyuwo atthu a oYuteya, ni . . . nyuwo munkhala oYerusalemu, musuweleke ela, ni mwiuwe masu aka:

Okhala wira atthu ala khahapaliwe, ntoko nyuwo sinuupuwel'anyu, okhala wira nlelo iwoora tthaaru sa voosiisu.

Ipaare hata khisaatthukuliwe okathi uwo. Munnona?

Masi ela tiile yaahimmwe ni profeta Yoweli;

. . . enimwiiraneya mahiku ookiserya, onihimya Muluku, Miyo kinimwaamwaraxela Erooho aka atthu othene: mw'ana anyu alopwana n'a . . . axithiyana, nto awo anoolaleya s'eprofeta, ni amiravo anyu animooniheriwa soowoona, ni anakhulu anyu anooloha sooloha:

Nave-tho arumeyi aka alopwana ni . . . athiyana Miyo kinimwaamwaraxela mahiku awo Erooho aka; . . . awo anoolaleerya:

Ni miyo kinimooniherya sootikiniha wirimu osulu, ni ithoonyeryo elapo ela ya vathi; . . .

Vano, ti Petru onlaleerya vano, ole orina ihulelo.

. . . ephome, . . . mooro, . . . otthuwa wa mwiixi:

Nsuwa ninrowa okhala epiphi...mweeri onrowa okhala ephome, nihinatthi ophiya nihiku nuulupale ni noottittimihwiwa n'Apwiya:

Vano enimwiraneya, wira othene ale anrowa ovekela mwa nsina n'Apwiya animoopowa.

Nyuwo atthu a Isarayeli, nwiriyane moolumo ala; Yesu a oNasareti, mutthu aakupaliwe ni Muluku eriyari anyu ni miiriirya ni sootikiniha ni ethoonyeryo, owo siirale-awe...eriyari anyu, . . .nyuwo mwaaxineene . . . sinsuwelaanyu:

Olavulaka so ompwapwela? Owo aahikhalana ihulelo, nyuwo moosuwela. Mukhale . . .

Yoola, mwaahivahereriwa ni wuupuwela ni osuwela khalayi wa Muluku, . . .

Eyo eri vo. Vaaweryaneya sayi Owo ovahereriwa? Okhala wira Muluku aahitthomela wira ekhale siiso. Munnona? Osuwela khalayi wa Muluku!

⁴⁵¹ [Munna mmosa oniira, "Oolikana?"—Mol.] Okathi vakhani paahi. Mwaaleele, elipelele minuutu mmosa paahi, mpakha kimalihe Yoolepwa.

. . .nyuwo moomukuxa, ni matata aatthu ootakhala, khimukhomela vamwiikimanyo khumwiiva:

Yoowo Muluku omuhihimunxaawe, amwaakihaka oweriya wa mookhwaani: okhala wira khivaaweryaneya . . .owo oweriwa ni yeeyo.

Tthiri Davidi oohimya mwaha wa yoowo airaka, okathi wothene miyo kaaniwoona Apwiya . . .moonoo aka woolopwana, ni miyo nkinthukumela:

Tivo murima aka vantteeliwaaya, ni nlumi naka nintthapaaya; hata . . .erutthu aka ennimumula ni ororomela:

Okhala wira khamunihiya munep'aka mookhwaani, nnakhala khamunimuhiya Oowaarya anyu wuntta.

Nyuwo mookisuweliha miyo . . .sawaka—iphiro saka, iphiro saka sa ekumi; nyuwo munoookisariha otteeliwa murima ni mukhalaka ni miyo.

Alopwana axinna, kimpavela wooleelani vootaphuwa mwaha wa tiithi ahu Davidi, . . .yoowo okhwiiye ovithiwa, nave mahiye awe ari ni hiyo mpakha . . .olelo.

Tivo oryene profeta, ni asuwelaka wira Muluku oolapha ni elaphelo . . .

Kinoomaluru olaleya.

...yeeyo wira—wira osuulu awe, owo aamurowa...
*wa erutthu, owo aamurowa onvenxa Kristu wira
 okilaathi veehicensi vawe;*

Yeeyo kimanlyaaka olaleya. Petru alaleyaka etthu emosaru.

Nto oonaka ela khalayi (Profeta aahoonu khalayi.)
*aahihimya sa ohihimuwa wa Kristu, wira munepa
 awe khohiwe mookhwaani, nnakhala erutthu awe
 khiyinttale.*

*Yesu ula Muluku oomuhihimuxa, yoowo hiyo othene
 nimmukhalelaahu anamoona.*

*Tivo ottittimihiwaka, ni va moonu woolopwana...
 okhalaka moonu woolopwana, oottittimihiwa wirimu,
 omwaakhelaka wAtithi...natiri a Erooho Yoowaarya,
 owo...oovaha yeela, nyuwo munoonaanyu ni
 muniwaanyu.*

*Okhala wira Davidi khowenle wirimu, (profeta):
 masi owo aahihimya mwaneene, APWIYA ahaahimeerya
 Apwiyaaka, Mukilaathi moonu aka wolopwana,*

*Mpakha miyo waahela awanani anyu vathi va inawu
 sanyu.*

*Tivo (nwiriyane ela) atthu othene a Isarayeli
 esuweleke wira vekeekhai, wira Muluku oomukhalaha
 Yesu yoola, nyuwo...mmukhomenle-anyu, Pwiya ni
 Kristu.*

Eyo yaahaana omaliha mwaha, kahi siiso?

*Vano awo vaiwaly'aya yeela, anatampi ale,
 yaahiriipiwa murima, khimuhimeerya Petru...
 Alopwana...ni Petru ni...akina...arummwa,
 Alopwana axinna, niireke-ni?*

452 Vaareera. Ela eri va. Owo orina exeenii? Ehulelo, ehulelo ya Momweneni. Ori vayi Omwene? Ori mwa nyuwo. Eyo ekeekhai? Erooho Yoowaarya ti Omwene wa Muluku. Hiyo noosuwela. Hiyo nniyariwa Momweneni, ntoko atthu ni oorummwa. Nkawehani. Owo ookhalana ihulelo epantte awe. “Munrowa wiiriha exeeni seiyo?” Ela emaara yoopacerya mukhora waahuliwaaya.

453 Vano, yookoha onikohiwa mulaleyi, emaara yoopacerya, ole orina ehulelo. Kookupali wira owo aahimye-ru wira, “Mweemele ni muru anyu,” eyo yaamukhala y’okhulupale.

454 “Sothene sinrow’anyu otthukwa vathi va, Miyo kinootthukwa Wirimu.” Vaareera. “Sothene sinihimy’anyu, kinrowa ohimya etthu emosaru. Mookhalana ehulelo.” Vaareera. Owo onihela ehulelo vamukhora.

...Muniira exeeni? Alopwana n’axinna, niireke-ni?

*Vano awo vaiwaly'aya yeela, awo yaahiriipiwa
 murima, khwira...Alopwana n’axinna,...*

... Petru aahiwaakhula wira, Murukunuxe murima, mpatisiwe khula mmosa a nyuwo mwa nsina na Yesu Kristu wira muleveleliwe itampi, nto nyuwo munimwaakhela yoovaha ya Erooho Yoowaarya.

Tthiri natiri t'awinyu, ni awaya an'inyu, ni awaya ale ankhala ottaiwene, othene ale Apwiya Muluku ahu antthun'aya owiihana.

Eyo yaahimaliha mwaha mahiku othene. Khaavo mutthu aakhanle, hata okathi mmosa, aarowa okhalakhala avaanyihaka Eyo.

⁴⁵⁵ Ekereja Katolika khurwa, ohiya opwinihiwa, awo anooyeeherya. Ohiya okhala erumeelaka Nsina na Yesu, awo akunxe, "Tithi, Mwaana, ni Erooho Yoowaarya." Khenatoko oxuttihiwa mBibiliani.

⁴⁵⁶ Khula mutthu, okhuma okathi yoowo mpakha ohoolo, aapatisiwe opwinihiwaka mwa Nsina na Yesu Kristu. Ni akina yaahipwinihiwa ni Yohani Mpatisa, aampatinse Yesu, nto Paulo khwaahimeerya wira awo khiyaakhanle waakhelaka Erooho Yoowaarya siiso. Awo yaahaana otthika ni opatisiwa-tho, mwa Nsina na Yesu, awo ehinatthi waakhela Erooho Yoowaarya. Akavi ansuwela wira eyo ti Yoolempwa? Miteko, kapiitulu 19. Eyo eri vo. Okhala wira, Omwene wa Wirimu waahimaliheriwa wa khula enamuna ekina, mwa olapha ni Yesu Kristu, wira eyo yaarowa okhala yoosuweliwa Wirimu.

... Murukunuxe murima, mpatisiwe khula mmosa a nyuwo mwa nsina na Yesu Kristu wira muleveleliwe itampi sanyu, ... munimwaakhela yoovaha ya Erooho Yoowaarya.

Okhala wira, natiri t'awinyu, ni awaya an'inyu, ... awaya ale ankhala ottaiwene, othene ale Apwiya Muluku ahu antthun'aya owiihana.

Amen. Nivekele.

⁴⁵⁷ Muluku Tithi, ohiy'ula, miyaakha ekonto emosa ni imiya thanu na xexe ni etthu soovira, nave elokelo ni ekhalelo oratta ya murima wa athu nlelo onninvekela Muluku, ntoko anamwane yinlelaka eleethi vanipeleni va maama aya. Hiyo ninnoophentani Nyuwo, Pwiya. Hiyo khaninwerya okhala nihikhanle ni Nyuwo. Ntoko Davidi sihimaly'awe, "Munep'aka onnivoliwa nthona wa Nyuwo, ntoko etthove eninlelaaya muro wa maasi." Eyo ehaana okhalana Yoowo, ahiiso enimookhwa.

⁴⁵⁸ Nto, Tithi, hiyo noovira mwa Soolempwa, nno ni iwe. Kahi wira nikhale oovirikana, masi hiyo ninnoona iseminaariyu iya, asomi ala a teyoloxiia olelo, yaawo anlaleya ettharihaka sooruma s'athu, nave voohikhala sooruma sa Muluku. Tivo, Pwiya, hiyo khinnaathanya athu awo, masi ninthanya itthu iyo awo aniixuttihaaya. Tivo, Pwiya, hiyo ninvekela wira

awo ephiyerye okhala axinn'ihu. Hiyo ninvekela wira Nyuwo mwaalevelele mwaha w'ovonya waya. Ni ninvekela wira awo erwe mwa Yoolempwa, esome Yeeyo, kahi enamuna eseminaariyu eniixuttih'aya Yeeyo, masi ntoko Muluku olempeawe Yeeyo.

⁴⁵⁹ Hiyo ninnivekela, Muluku, vano, wira anamwiivahererya ala anrwa ohiy'ula wira epatisiwe mmaasini, okathi pastore ahu oottittimiheya onrwaawe vapulpitu va, wira olaleerye Ehapari yooreera, Ehapari yooreera yeela emosaru, nto nuumala orowe mutankini mwa opatiiso, osikha, munivahe, Pwiya, wira khula mmosa wa ala aakhele Erooho Yoowaarya, okhala wira Nyuwo moonivaha natiri, "Munimwaakhela Erooho Yoowaarya." Erooho ya Muluku ekhale elipelelaka vasulu va maasi, wira emwaakhele namwiivahererya ohiy'ula, maana hiyo ninaavahererya awo mmatatani Mwanyu, mwa Nsina na Yesu Kristu. Amen.



AHEPERI, EKAPITULU YA NEETHANU NENLI ² EMK57-0922E
(Hebrews, Chapter Seven ²)

ITTHARANELO YA ELIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeettaka 22 mweeri wa Setembro, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org